

Saveeņ To Timbooda Ila To Yes Hibrua Hibru—Hebrews

Maaron Natu to ipatoonġ ghiit pa Tama Maaron

¹ Muuņ, Maaron isavia aliņa pa propet toni pae katindi ila ataam naol naol. Tauto tigham avo, ve tivotia aliņa pa nditimbud.

² Eemoghon aazne, taneep ila sawa paghu to Maaron ighaze ipasob uraat toni. Tovenen sawa tonene, iit talooņ Maaron aliņa ila tau Natu avo. Sawa to Maaron ighur sambam ve taan toman mbep to naol, ye ighur di tivot ila Natu tonowen nima. Ve ye ighaze ighur mbep naol tonowen tisob tinim Natu le, leso inġin di. *Mt 11:27; Yo 1:3; Kol 1:16; Hib 12:25*

³ Ye to inim ghazonġa pait ve isul ghiit, ve ipatoonġ ghiit pa Tama Maaron tapiri ve poia toni. Ye igham Tama Maaron nagho kat. Maaron tapiri ve nġar isob to ineep toni, nene ineep to Natu paam. Natu saveeņ toni, nene tapiri tiina kat, ve ikis mbep tisob tineep tunġa. Ye imaat ve ireu sosor toit, ve igham ghiit tanġalaanġ ila Maaron mata. Ghoru imuul iza ila pa sambam, ve mbole izi ila pa Maaron arianaġa tau nima waan. *Yo 1:14; Mk 16:19; Kol 1:15+*

Maaron Natu ilib pa yes aņela

⁴ Tovenen Maaron Natu ilib kat pa yes aņela. Pasa, iza to Maaron igham pani, nene tiina ve poia kat ilib pa yes aņela izadi. *Pil 2:9+*

⁵ Aghita. Maaron isaav pa Natu ighaze:

“Aazne, you nasaav ghazooᅇa tovene: You natug yom. Yom tamam to you. Aazne, you naghur ghom pa uraat.” *Mbo 2:7; Mt 3:17; Hib 5:5*

Ve isaav muul ighaze:

“Ye tama you, ve ye you natug.” *2Sam 7:14*

Maaron isavia saveeᅇ tovene pa aᅇela eta maau. Saveeᅇ tonene iᅇarua Natu moghon.

⁶ Ve sawa to Maaron ighaze imbaaᅇ Natu aidaba izi inim taan, ye isaav tovene:

“Aᅇela tisob to Maaron irau tiput aghedi pani, ve tipaiti.” *Mbo 97:7*

⁷ Ve yes aᅇela, Maaron isavia di ighaze:

“Aᅇela, yes uraata toni to timbesmbees pani. Ye igham di tinimale yaghur ve yab yama.” *Mbo 104:4*

⁸ Eemoghon ye isavia Natu ighaze:

“Maaron, pooz tiom irau isob ne maau. Uneep ila inam to ghamuᅇᅇ pooz itaghoni taghoni gha ila.

Ngar deᅇia to inim ghilalooᅇ pa pooz tiom.

⁹ Yom lolom pa ᅇgar deᅇia, ve ughur koi pa ᅇgar samsamia to tiyel pa tutuuᅇ.

Tovenen Maaron tiom ipait ghom le ulib pa nditam pida, ve ilin ᅇgoreeᅇ izala poghom pa ighur ghom unum kinik.

Tauto igham ghom lolom poia le poia kat.” *Mbo 45:6+*

¹⁰ Ve saveeᅇ waaro ite to iᅇarua Maaron Natu, nene isaav tovene:

“Tiina, muuñ kat yom ughur taan, ve ugharaat pughu le iyaryaan. Ve sambam paroñania paam, nene nimam muri.

¹¹⁻¹² Sambam paroñania ve taan pale tisami tinimale uli to muñginaan ve imarepreep.

Tovenen yom pale uloi di inimale nonogiña muñgina, ve urabolin di pa sambam paroñania paghu ve taan paghu.

Eemoghon yom, ghoru unepneep moghon tovene. Sawa tiom irau isob maau. Iseñseenja itaghoni taghoni gha ila.” *Mbo 102:25+; Hib 13:8; Yems 1:17; 2Pe 3:13*

¹³ Ve muuñ, Maaron isaav pa Natu ighaze:

“Unum mbolem izi ila pa nimag waan, le irau natatan koiamña ve tapiridi isob kat, ve uvazag di ila aghem samba.” *Mbo 110:1; Mk 12:36*

Aghita. Sawa eta ye isaav tovene pa añela eta? Maau. Saveeñ tonene injarua Natu moghon.

¹⁴ Pasa, añela, yes mbesoonja to Maaron. Ye imbanbaañ di pa tiuul yes to ye ighaze igham mulin di. *Mbo 34:7, 91:11, 103:20; Mbañ 12:7*

2

Taghur muriid pa Ulaaña toit Krisi malep

¹ Tovenen Maaron aliña to taloonja, iit irau mataad kisini ve tataghoni kat. Pa vene, tapul Maaron tanimale waan to wañaar igherebi ve imoghan ilale.

² Aghita. Maaron aliña to muuñ yes Israela tiloonja ila yes añela avodi, nene onoon ve ineep tunja. Tamtoghon tisob to titaghoni maau ve

timalaanj pani, Maaron ighurghur di maau. Yes tisob tigham atia denja itaghon sosor todi.

³ Ve uraat to Yesu ighami pa igham mulin ghiit, nene tiina le tiina kat. Tovenen ighaze lolood imaagh ve tapul ngar pani, pale tapaghau tauud pa Maaron mbalmbali toni vena? Maau. *Hib 10:28+, 12:25*

Uraat tonenen, Tiina toit Yesu ivotia muun. Ghoroyes to tiloon saveenj ila toni, anadi tipalot saveenja pait. *Mk 1:14+; Mbanj 1:8; 1Yo 1:1+*

⁴ Ve Maaron ipariaanj saveenj tonenen paam. Pasa, irei uraat ve tapiri naol to Avuvu Patabuanj pa tamtoghon toni itaghon tau lolo. Ve ipalot di ve tigham uraat tintina ve mbef gharatoonjadi naol naol to tipatoonj di tighaze ye ineep toman di pa uraat todi. *Mk 16:20+; Mbanj 14:3; 1Kor 12:4-11*

Maaron itatan Yesu iza, ve muri ghoroy igham iza ivot inim tiina muul

⁵ Sambam paghu ve taan paghu to nisavia ne, Maaron ighur yes anjela pa tinjin di maau.

⁶ Pasa, Maaron alinja waaro eez to ngeu eez ivotia, isaav ighaze:*

“Maaron, yei tamtoghon to taan ninim sa mbef poia, to yom matam ingalngal ghei?
Yei tamtoghon ndinatudi, pughu vena to yom matam payei? *Mbo 8:4+, 144:3*

* **2:6:** Saveenj to ineep ila rau to mbounj, isavia iit tamtoghon to taan. Eemoghon ngeu to imbood saveenj to Buk Hibru, ye igham ngar ighaze saveenj tonene denja kat pa Yesu. Pasa, ye iza tiina kat. Ilib pa yes anjela. Eemoghon sawa to izi inim taan, ye itatan tau iza. Ve sawa to imuul iza ila pa sambam, ye igham iza tiina kat, ve Maaron ighur mbef tisob tila nima, lesu injin di.

7 Yom ughur ghei ve ugham ghei nizi ris moghon pa yes aņela.

Ve upait ghei, ve ugham izamai ivot inim tiina.

8 Ve ughur mbeb tisob tineep ila sambamai, leso niņgin di.”

Sawa to Maaron ighur mbeb tineep ila iit tamtoğhon sambaad, ye iņguruut mbeb eta maau. Ighur mbeb tisob tineep ila sambaad. Onoon aazne, taghita anoņa sone. Pasa, mbeb tisob tineep ila iit tamtoğhon sambaad sone. *Mt 28:18; 1Kor 15:25+; Ep 1:22*

9 Eemoghon Yesu, ghoru iit taghita. Ye iparab ariana le ilib. Tauto aazne, Maaron ipakuri, ve igham iza ivot inim tiina kat. Sawa tuku to Yesu ineep izi taan, Maaron itatan iza ve ighuri izi ris pa yes aņela. Pasa, ye ighaze igham poian ghiit ve igham mulin ghiit pa mateeņ. Tauto Yesu igham iit tasob inaad, ve igham yabyabuun tiina, ve imaat. *Pil 2:7+; 1Yo 2:2; Syg 5:9*

Yesu irau iuul ghiit pasa, ye tamtoğhon inimale iit

10 Maaron inim pughu pa mbeb to naol ne, ve ighur mbeb tisob tivot pa tau. Ye ighaze igham tamtoğhon katindi tinim ndinatu, ve igham di tila tineep tomani ila ņguruba lolo izi sambam. Tauto igham Natu Yesu iyamaan yabyabuun tiina. Ngar toni tonene deņia. Pasa, yabyabuun to Yesu ighami, tauto ighami inim volaana poia eez. Ye irau imuun pa Maaron ndinatu, ve iparab padi, leso igham mulin di. *Ro 11:36; Hib 5:8+*

11 Yesu toman yes to ye igham di tinim tamtoğhon patabuana to Maaron, lupuun todi ee moghon.

Tauto maya pa iwaat di tonvetaz toni maau. *Mk 3:35; Hib 10:10*

¹² Aghita. Ye isaav pa Maaron ighaze:

“You pale navotia izam ve ngar tiom pa tonvetaz tiou.

Ve ighaze tamtoghon tiom tilup di pa sunjuun, you pale nala toman di, ve nambou pa napait izam.” *Mbo 22:22*

¹³ Ve ye isaav muul ighaze:

“You pale nanumeer Maaron.” *Mbo 18:2*

Ve isavia saveen ite ighaze:

“Ughita. You taug tonene. Yeina ndipain to Maaron igham di payou, tauto ninepneep.” *Is 8:18; Yo 17:6,9+*

¹⁴ Ndipain to ye isavia di, nene iit tamtoghon to taan to taghur ila toni. Tauto Yesu paam inim tamtoghon to taan raraate inimale iit, ve iyamaan patajani naol to taan ve imaat, leso ipasob Ngeu Samia tapiri. Pasa, ye to inim pughu pa mateen ve iwaghamun tamtoghon. *Mbnp 3:1+; Yo 1:14, 12:31; 2Tim 1:10*

¹⁵ Sawa isob to taneep izi taan, iit tanim mbe-soonja pa mateen. Pasa tamatughez pani, ve matughezaan tonene ikis ghiit ariana. Eemoghon mateen to Yesu, nene ipas ghiit pa patajani tonene wa.

¹⁶ Iit tawatag: Yesu inim pa iuul yes anjela maau. Ye inim pa iuul iit papaghu to Abaram. *Ga 3:7,29*

¹⁷ Pughu tonene to ye ighita ighaze ye izi inim taan ve inim tamtoghon raraate inimale iit tonvetaz toni pa mbeb to naol ne, ghoru poia. Leso inim daba to watoonrau to lolo isamin ghiit, ve igham

poian uraat to Maaron ighuri ila nima, ve ireu sosor toit, ve itatan mbalmbali to Maaron. *Pil 2:7; Hib 2:11, 3:1*

¹⁸ Ye iyamaan tovaan ve patanani naol to taan wa. Tauto ye iraua kat pa iuul yes to tovaan igham di. *Mt 4:1+; Hib 4:15*

3

Yesu iza tiina ilib pa Mose

¹ Yam tonvetaz, poiñ to ndug sambam igham gham anim Maaron tamtoghon toni patabuanja wa. Tovenen matamim ingal pooi pa Yesu. Iit taghur ila toni, ve tavovotia varu taghaze ye mbanjoña to Maaron, ve daba tau to watoonrau. *Hib 2:17, 4:14+, 12:2*

² Uraat to Maaron ighuri ila nima, ye ighami itaghon katin Maaron ngar toni, inimale muun Mose igham katin uraat to Maaron ighuri ila nima, ve ingin poian Maaron ruum toni. Ruum tonowen, nene yes Israela to Maaron igham di tinim le. *Nam 12:7*

³ Iit tawatag: Ighaze ngeu eta irei ruum poia eta, nene pale tamtoghon tipait ruum tonenen. Eemoghon ngeu to irei ruum, ghoru tipaiti kat. Nene raraate inimale Mose ve Yesu. Yesu iza ilib pa Mose pasa, Mose ye inimale ruum moghon. Ve Yesu, ye inimale ngeu to irei ruum.

⁴ Ruum to naol ne, tamtoghon tirei di. Eemoghon Maaron to ighur mbeb tisob tivot. *Mbnp 1:1+*

⁵ Mose, ye mbesoonja to Maaron ve igham katin uraat naol pa ruum to Maaron itaghon Maaron ngar toni. Ve ye isavia mbeb pida to muri Maaron ivotia di tivot tighazoon.

⁶ Eemoghon Krisi, ye Maaron Natu to ingin poian ruum to Maaron itaghon Maaron n̄gar toni. Ve ighaze tamatughez maau, ve takis ghurla toit tun̄ja, ve taghur mataad pa nepoon̄ poia to Maaron pale igham pait, ve tiniid iza pani, nene pale tapatoon̄ tauud taghaze iit ruum to Maaron. *1Kor 3:16; 2Kor 6:16; Hib 6:11*

Tamtoghon to tizorzoor Maaron alīja, ye irau igham di atedi izi maau

⁷⁻⁸ Tovenen aloon̄ saveēn to Avuvu Patabuan̄ ivotia pait. Ighaze:

“Aazne, ighaze yam aloon̄ Maaron alīja, apoon̄ lolomim pani malep.

Ve atoov Maaron ve azoora inimale muun̄ nditimumim tighami izi ndug balim malep.

⁹ Ndaman tamoot ru to tineep izi ndug balim, you nagh̄am uraat tintina ila lolodi, ve tighita pa taudi matadi.

Eemoghon tighur inim tiou maau, ve tino-knok tovaan̄ ghou.

¹⁰ Tauto tigham ghou ateg yabyab kat, ve nasaav padi naghaze:

‘Ndiran tonowen lolodi pa titaghon ataam tiou maau.

Moghon moghon tiyel pa ataam tiou.’

¹¹ Tauto nasaav arianā padi toman ateg yabyab, ve napariaan̄ saveēn tiou naghaze:

‘Onoon kat. Ndug to naghaze atedi izi pani, yes irau tiloon̄ tila pani maau. Maau le maau kat!’ ” *Nam 14:21+; Mbo 95:7+; Mt 4:7*

¹² Tovenen yam tonjvetaz, apatum gham: Pa vene n̄gar samia ighereb tiam eta, ghero ipul ghurla toni, ve ipul muri pa Maaron mata yaryaara.

¹³ Ndag to naol ne, yam irau awapalotin gham pa n̄gar poia. Pa vene, n̄gar samia itombaan tiam eta, ghero ipoon lolo, ve irau ighilaal Maaron muul maau. Uraat to palotiin tonenen, asakia ila sawa ite paam malep. Aghami to aazne. *1Tes 5:11,14; Hib 10:24+*

¹⁴ Sawa to taghur ila to Krisi muun, taghur ila toni ariana. Iit irau tikis ghurla toit tunja tovene le sawa toit isob. Leso tapatoon tauud taghaze iit itaad ite Krisi ve talup tomani. *1Kor 15:2; Hib 6:11, 10:35; Syg 2:25*

¹⁵ Saveeja, Maaron isavia muun wa. Ighaze: “Aazne, ighaze yam aloon Maaron aliña, apoon lolomim pani animale nditimbumim to muun tizoor Maaron aliña izi ndug balim ne malep.” *Mbo 95:7+; Hib 4:7*

¹⁶ Laak, sei masin to tiloon Maaron aliña ve tizoora? Nene yes ival tiina to Israel to Mose imuun padi ve igham di tipul Isip ve tila.

¹⁷ Ve sei masin to Maaron ate yabyab padi irau ndaman tamoot ru? Nene yes Israela to tinoknok ghamuun sosor. Tauto Maaron irab di timatmaat ve patudi tiwaghengheen izi ndug balim. *Nam 14:1-35; 1Kor 10:1+*

¹⁸ Ve sei masin to Maaron isaav ariana padi, ve ipariaan saveen toni ighaze ndug to ye ighaze atedi izi pani, yes irau tiloon tila maau? Saveen tonenen inarua yes to tizoor ye aliña.

¹⁹ Saveen naol tonene ipatoon ghiit ighaze yes Israela tighur ila maau, tauto yes irau tiloon tila

ndug to Maaron ighaze atedi izi pani ne maau. *Yo 3:36; Hib 4:6*

4

Maaron imbua saveeŋ toman tamtoghon toni ighaze ye pale igham di atedi izi

¹ Tovenen Maaron imbua saveeŋ toman tamtoghon toni ighaze ye pale igham di atedi izi.*

Ve saveeŋ mbuaaŋ tonowen inepneep sone. Tovenen iit irau tamatughez ve mataad iŋgal tauud pooi. Pasa, ighaze tiam eta itaghon ataam to Krisi ila, eemoghon ipasob laghoon toni maau, ve imuul izi ataam luvuŋa moghon, nene pale irau ighita saveeŋ mbuaaŋ tonenen anoŋa maau. *Hib 3:14*

² Onoon, tivotia varu poia pait ve taloonŋa wa, inimale muuŋ ival tiina to Israel tiloonŋ Maaron aliŋa. Eemoghon saveeŋ tonowen iuul di maau. Pasa, sawa to tiloonŋa, tighur ila maau.

³ Aazne, iit tamtoghon to taghur ila to Krisi, tauto ye igham ghiit ateed izi. Ve yes to tighur ila maau ne, irau atedi izi maau. Pasa, Maaron isaav ighaze: *Mt 11:28*

“You nasaav arianaŋ padi toman ateg yabyab, ve napariaaŋ saveeŋ tiou naghaze:

* **4:1:** Nepoon to ateed izi to Maaron igham pa tamtoghon toni, nene ŋgara tol. 1) Muuŋ, Maaron igham yes Israela tiloonŋ tila taan Kanaan, leso tigham taan tonowen inim ledi ve tineep pooi. 2) Aazne, Krisi igham ghiit ateed izi pasa, iit irau tanumeer uraat ve poia toni pa igham ghiit taneep denjaad ila Maaron mata. 3) Muri, Maaron pale igham tamtoghon toni tila ndug sambam, leso atedi izi ve tineep pooi.

‘Onoon kat. Ndug to naghaze atedi izi pani, yes irau tilooᅇ tila maau. Maau le maau kat!’ ”

Mbo 95:11; Hib 3:11

Eemoghon sawa to ye igham ghiit ateed izi, nene inepneep sone. Pasa, muuᅇ kat, sawa to Maaron ighur sambam ve taan, ye ipasob uraat toni le isob. Ve aazne, ye inamnaam ghiit.

⁴ Aghita. Saveeᅇ toni waaro eez isaav ighaze: “Sawa inim liim ve ru, ghoru Maaron ate izi pa uraat toni to naol ne.”

Mbnp 2:2+

⁵ Ve saveeᅇ waaro ite isaav tovene:

“Ndug to naghaze atedi izi pani, yes irau tilooᅇ tila maau.”

Mbo 95:11

⁶ Tovenen saveeᅇ mbuaaᅇ to Maaron to isaav ighaze ye pale igham tamtoghon toni atedi izi, nene inepneep sone. Ve tamtoghon pida pale tighita saveeᅇ tonenen anooᅇa. Eemoghon yes to tilooᅇ mbeb tonenen varu muuᅇ, tighita anooᅇa maau. Pasa, tizoor Maaron aliᅇa.

⁷ Tauto Maaron ighur sawa ite pa igham tamtoghon toni atedi izi kat. Sawa tonenen, tauto aazne taza pani wa. Aghita. Ndaman katindi inim ila, ve muri ghoru, Maaron ivotia nepooᅇ tonenen saveeᅇa ila David avo ighaze:

“Aazne, ighaze yam alooᅇ Maaron aliᅇa, apoon lolomim pani malep.”

Mbo 95:7+

⁸ Onoon, Yosua igham yes Israela tilooᅇ tila taan Kanaan. Eemoghon ye igham di atedi izi kat maau. Pasa, inimale ye igham di atedi izi kat, tone irau Maaron isavia sawa ite paam to igham tamtoghon atedi izi ne maau.

Yos 22:4

⁹ Tovenen nepooᅇ to Maaron igham tamtoghon toni atedi izi kat inimale nepooᅇ to umbom

patabuan, nene inepneep sone.

¹⁰ Ighaze Maaron igham tamtoghon eta ate izi, nene pale uraat toni isob, ve ate izi kat, inimale Maaron ighur sambam ve taan le isob, ghoru ate izi. *Syg 14:13*

¹¹ Tovenen iit irau tazuarua ghiit kat le taneep ateed izi itaghon Maaron ngar toni. Pa vene, toit eta izoor Maaron inimale yes Israela, ghoru itap pa ghurla toni, ve irau igham nepoon tonowen maau.

Saveen to Maaron, mata kat

¹² Maaron aliŋa, nene saveen mata yaryaara, ve ighamgham uraat toman tapiri tiina. Ve saveen toni, mata kat. Ilib pa buza to mata ru. Tauto inŋalŋal katin lolood, ve ipatoon ngar to inep ila lolood ne ivot ighazoon. Leso taghilaal ngar sine to ivot ila to Maaron Avuvu, ve ngar sine to ivot ila tauud ngar toit moghon. *Ep 6:17; Syg 1:16*

¹³ Maaron, ye mata mala. Mbeb to ye ighur di, eta iyoon pani maau. Mbeb ngozaan tisob tineep tighazoon ila mata. Ve iit tasob pale tayoon ila ye mata, lesu tavotia ngar to tagham di ne ila toni, ve inŋabiiz ghiit. *Mbo 33:13+, 139:1+; 2Kor 5:10*

Yesu, ye daba tau to watoonrau

¹⁴ Tovenen ghurla toit to tavovotia ne, takisi tunja. Pasa, iit leed daba tiina eez to watoonrau. Nene Yesu. Ye Maaron tau Natu. Ye malmali iza ila le ila peria to Maaron to sambam we, lesu igham avood ve isavia saveen toit ila toni. *Hib 3:1, 6:11, 10:35+*

¹⁵ Onoon, iit tamtoghon tapiriid imbool. Eemoghon daba toit to watoonrau tonene, ye

lolo isasamin ghiit. Pasa, tovaan̄ tisob to tivotvot pait ne, tivot pani paam, ve ye iwataḡ di wa. Eemoghon ye igham sosor eta maau. *Mt 4:1+; 2Kor 5:21; Hib 2:17; 1Pe 2:22; 1Yo 3:5*

¹⁶ Tovenen iit tamatughez pa tala tagharau Maaron malep. Taghur sun̄uun̄ toit in̄arua ina to ghamuun̄ pooz irau sawa isob. Pasa poia toni, nene tiina le tiina kat. Tovenen sawa to patañani igham ghiit, ye pale lolo isamin ghiit, ve iuul ghiit itaghon tau poia toni. *Ep 3:12; Hib 10:19+*

5

Krisi, ye n̄geu to watoon̄rau inimale Melkizedek

¹ Daba tisob to watoon̄rau, Maaron ipas di ila tamtoghon lolodi, ve ighur di pa uraat. Leso tigham tamtoghon naghodi, ve tigham uraat pa watoon̄rau todi ila ye mata. Yes tighurghur paitoon̄ to tamtoghon tila pa Maaron, ve tighamgham uraat pa watoon̄rau todi, lesa Maaron ireu sosor todi. *Hib 8:3*

² Yes to tikankan̄ pa Maaron aliña ve tiyel pa ataam toni, daba to watoon̄rau irau tigham arianā pa di maau. Tisasavia saveen̄ luuma pa di. Pasa, ti-watag: Yes paam tapiridi imbool, ve tighamgham sosor.

³ Pughu tonene to daba to watoon̄rau irau igham watoon̄rau pa ireu tau sosor toni muun̄. Le isob, ghoru igham pa sosor to tamtoghon pida. *Hib 7:27, 9:7*

⁴ Daba to watoon̄rau, ye iza tiina pa uraat toni. Ve n̄geu eta irau idodon tau pa uraat tonene maau. Maaron tau irau ipoi, ve ighur uraat tonene ila nima inimale muun̄ igham pa Aron.

⁵ Krisi tovene paam. Ye ipakur tau ve ighur tau inim daba to watoonrau maau. Maaron tau ighuri pa uraat tonene. Aghita. Muun, ye isaav pani ighaze:

“You natug yom.

Yom tamam to you.

Aazne, you naghur ghom pa uraat.” *Mbo 2:7; Mt 3:17; Hib 1:5*

⁶ Ve saveen toni waaro ite isaav ighaze:

“Yom ngeu to watoonrau inimale Melkizedek.

Ve yom pale uneep tovene itaghoni taghoni gha ila.” *Mbnp 14:18+; Mbo 110:4; Hib 6:20*

⁷ Sawa to Yesu inim tamtoghon ve ineep izi taan, ye isun pa Maaron ighaze iuuli, ve itan rorani toman aliņa tiina ve mata suru izi. Pasa, ye iwatag: Maaron irau igham mulini pa mateen. Ve Maaron iloon sunuun toni. Pasa, ye iroron pa Maaron ve ineep ila samba. *Mk 14:35, 15:34+; Yo 12:27; Pil 2:8+*

⁸ Onoon, ye Maaron tau Natu. Eemoghon patanani naol to ye imbaad di, tauto igham ngar toni ighazoon kat pa ngar to taghoniin Maaron aliņa.

⁹⁻¹⁰ Ve ighami iraua kat pa igham uraat to watoonrau. Tauto Maaron isaav pani ighaze ye ighuri inim daba to watoonrau inimale Melkizedek. Tovenen tamtoghon to tiloon aliņa ve titaghoni, ye pale igham mulin di tisob, ve tineep pooi itaghoni taghoni gha ila. *Hib 2:10,17, 5:6, 7:1+*

Tagham ngar inimale ndipain geegeu malep

¹¹ Lemai saveen naol to nighaze nasavia pa Yesu ve uraat toni. Eemoghon ighaze nila lolo pa

saveeŋ tonene, pale ipataŋan payam. Pasa, saveeŋ to yam alonlooŋa, ŋgar tiam ivot pani rikia maau.

¹² Aghita. Yam agham Maaron saveeŋ toni muuŋ wa. Tovenen naghaze pa yam apatoot tamtoŋhon pida pani wa. Eemoghon maau. Yam animale yes to papaghudi pa tigham Maaron saveeŋ toni. Yam animale ndipain geegeu to tighunghun tuz sone. Irau aghan aniin ariana maau. *1Kor 3:1+*

¹³ Tamtoŋhon to tighunghun tuz moghon, ŋgar todi inimale ndipain geegeu. Pasa, ŋgar to denja ila Maaron mata, yes tighazooŋ pani sone.

¹⁴ Ve aniin ariana, nene to yes to ŋgar todi imatu wa. Ndiran tovene, mos to Maaron ipatooŋ di le ŋgar todi ivot wa. Tauto yes irau tighilaal ŋgar sine to poia, ve ŋgar sine to samia. *Ro 16:19; Ep 4:14; Pil 1:10*

6

¹⁻² Sawa to talooŋ saveeŋ to Kriŋi inim paghu, tipatoot ghiit pa ŋgar rauraua muuŋ. Ngar tovene: Ngar to pale igham ghiit tamaat ve talaleed, iit irau tapuli ineepile, tatoor ŋgar toit, ve taghur ila to Kriŋi. Ve tipatoot ghiit pa ŋgar naol to ghamuuŋ ya,*

* **6:1-2:** Muuŋ, tamtoŋhon tigham ya pa pughu naol. Ighaze tamtoŋhon eta to Yuda maau ne, ighaze itoor ŋgar toni ve itaghon yes Yuda pa sunuuŋ todi, ye igham ya. Ve ighaze tamtoŋhon eta ighaze itaghon ŋgar to Yoan ŋgeu rughuzaaŋa, nene ye paam igham ya. Yes Yuda timenmen nimadi ve titaghon ataam naol pa ririwaan, leso tinjalaan ila Maaron mata. Ve Kriŋi tamtoŋhon toni tigham ya, leso tila toman Kriŋi pa mateeŋ toni, ve yesŋa Kriŋi tilup di tinim ee moghon.

ve ngar to ghuruuñ nimaad izala tamtoghon poghodi pa tapalot di, ve mundigiin to yes ma-teenja. Ve tipatoot ghiit tighaze Maaron pale ingabiiz ghiit ve ighur atia pait. Ve atia tonowen pale ineep le alok. Ngar tovene to tipatoot ghiit pani muuñ, ghoru tisavia ngar pida. Nene poia. Eemoghon ighaze tasasavia ngar tovene moghon, nene inimale iit taghelia gungun moghon, ve tarei ruum anoja maau. Tovenen iit irau tazuarua ghiit le taghazoon pa ngar pida paam, leso ngar toit imatu pa Maaron saveen toni.

³ Ve ighaze Maaron iyok pait, nene pale tagham tovene.

Yes to tighur muridi pa Krisi, ledi ataam muul maau

⁴ Aghita. Ighaze tamtoghon eta ipul muri pa Krisi, nene pale iit leed ataam eta pa taghami itoor ngar toni imuul ila pa Krisi ne maau. Tamtoghon pida, Maaron ipaghazonan di ve ngar todi ighazoon wa. Ve Maaron Avuvu igham uraat padi, ve poia toni to ineep sambam ve izi inim, yes tiyamaana wa.

⁵ Yes tigham saveen to Maaron, ve tiyamaana tighaze poia. Ve Maaron tapiri naol to muri pale tivot tighazoon, yes tiyamaan di ris wa. *Mbo 34:8*

⁶ Tamtoghon tovene, ighaze tighur muridi pa Krisi, yes ledi ataam pa titoor ngar todi ve timuul tila toni ne maau. Pasa, ngar to tighami, nene inimale tirab Maaron Natu izala ai pambaroon muul, ve tipamayanjini ila ival tiina matadi. *Hib 10:26+; 2Pe 2:20+; 1Yo 5:16*

⁷ Taan to ighaze uman izizi pani ve aniiñ popoia titubtub ila, nene iuul yes to tighanghan ila taan

tonenen. Taan tovene, poia to Maaron pale ineep ila.

⁸ Eemoghon taan to kikiliinj samsamia toman waar mata mata moghon titubtub ila, nene taan poia maau. Taan tovene ipatumi. Pasa, ighaze ineepneep tovene itaghoni ila, nene pale mala maau ve Maaron iwaghamuni, ve yab ighani. *Mt 3:10, 7:19; Lu 13:6+*

⁹ Yam ndiran tiei, lolomai payam kat. Onoon, saveeņ to aazne nisavia payam ne, ariana ris. Eemoghon yei nighur ila ariana nighaze yam animale taan samia maau. Yam animale taan poia. Tovenen Maaron pale igham mulin gham ve aneep pooi.

¹⁰ Pasa, ye itaghon ngar denja moghon. Irau igham ngar samia eta maau. Tovenen ye irau lolo imaagh pa uraat tiam popoia ve ulaaņ to yam aghamgham pa tamtoghon toni ne maau. Aazne paam, yam auluul di. Ngar tonanan ipatoon gham ighaze lolomim ineep toni kat. *Mt 10:40+, 25:40; 1Kor 15:58*

¹¹ Yei nighaze yam asob azuaria gham le ataghon katin ngar to Krisi. Tovenen lolomim ru malep. Akis ghurla tiam tunja le irau agham nepoon poia to aghurghur matamim pani ne.

¹² Tovenen amalai malep. Matamim iyaryaar, ve ataghon ngar to yes to tighur ila to Maaron, tiyoon ariana pa badoon patanani, ve tisanan le tighita saveeņ mbuaaņ toni anona. *Hib 10:36, 12:1; Yems 1:3+*

Lolood ru pa saveeņ mbuaaņ to Maaron malep

¹³ Sawa to Maaron imbua saveeņ toman Abaram, ye iwaat tau iza pa saveeņ mbuaaņ

toni lesu ipariaaŋa. Pasa, tamtoghon eta iza ilib pa Maaron maau. Tauto iwaat tau iza pa saveeŋ tonowen, lesu ipariaaŋa le iyaryaŋ kat ighaze:

¹⁴ “Onoon kat. You taug pale naghur poia tiou tiina iza tiom, ve naghama papaghu tiom timasa tinim naol.” *Mbnp 22:16+*

¹⁵ Abaram ighur ila saveeŋ mbuaŋ tonene. Tauto ate izi, ve inamnaam ila le ighita anona.

¹⁶ Iit tamtoghon gabuaad tovene: Ighaze itina ndiran pida tawazoran ghiit pa mbeb eta, nene pale tawaat tamtoghon eta to iza tiina ilib pait. Lesu iza tonowen ipariaaŋ saveeŋ toit, ve ipoon ndiran tonenen avodi. *Igham 22:10+*

¹⁷ Maaron tovene paam. Ngar toni iyaryaŋ kat ighaze igham poian Abaram toman papaghu toni. Irau itoor ngar toni muul maau. Tauto iwaat tau iza pa saveeŋ mbuaŋ toni, ve ipariaaŋa le iyaryaŋ kat. Lesu iit tamtoghon to izaad pa mbeb to ye imbua saveeŋ pani ne, lolood ru pani sob.

¹⁸ Tovenen iit to tayoon ila to Maaron, leed mbeb ru to tipariaaŋ ghiit pa taghur ila toni. Eez, nene saveeŋ mbuaŋ toni. Ve ite, nene ye tau iza to iwaata pa ipariaaŋ saveeŋ toni. Mbeb ru tonene, Maaron irau itoor ngar toni, ma itombaan ghiit pani ne maau. Mbeb ru tonene tipariaaŋ ghiit kat, lesu takis ghurla toit tunja, ve taghur mataad pa nepoon poia to Maaron pale igham pait. *Tit 1:2*

¹⁹⁻²⁰ Nepoon poia to taghurghur mataad pani ne, nene ikis ghiit tunja, inimale badewaan to ikis waan. Pasa, Ngeu to inim ataam pait pa tagham nepoon tonenen, ye imuun pait, ve iloon ila rumai to ndug sambam wa. Nene Krisi. Ve uli to ipoon rumai lolo to patabuan le patabuan kat, ye ila

ilib pani, le ila peria to Maaron. Pasa, Kresi, ye inim daba tau to watoonrau inimale Melkizedek. Tovenen ye pale iyoon bodbodaan pa Maaron ve iit tamtoghon, ve uraat toni tonowen iseenga itaghoni taghoni gha ila. *Mbo 110:4; Hib 4:14, 5:6, 9:24*

7

Melkizedek, ye kinik ve ngeu to watoonrau

¹ Melkizedek to nasavia ne, ye kinik to ndug Salem,*

ve ye ngeu to watoonrau to imbesmbees pa Maaron Tiina To Ilib Pa Ndimaronja Tisob. Sawa to Abaram yesja kinik pida tigham malmal ve ilib padi, ye imuul ila le ivot to Melkizedek izi ataam luvuŋa. Ghoru Melkizedek ighur poia to Maaron iza toni. *Mbnp 14:17+*

² Ye ighur poia to Maaron iza toni le isob, ghoru Abaram imundig, ve ilup mbef tisob to tila tigham malmal ve tiyou di tinim ne, ve ivalag di tinim ndouŋ saanŋul. Ghoru ighur ndouŋ eez inim Melkizedek le.

Yo, Melkizedek iza pughu tovene: ‘Kinik to ngar denja.’ Ve ye inŋin ndug Salem. Ve Salem pughu, nene ‘ngar luuma.’ Tovenen ye kinik to ngar denja ve ngar luuma.

³ Ve mbef ite. Ighaze tawaat Maaron aliŋa, nene taghita saveeŋ waaro eta to isavia Melkizedek tama ve tina ve pughu toni ne maau. Ve sawa to tina ipooŋa, ve sawa to ye imaat, nene paam, timbood saveeŋa eta maau. Tovenen taghita taghaze

* **7:1:** Yerusalem iza ite, nene Salem (Mbo 76:2).

ye inim ghilaloon poia eez pa Maaron Natu. Pasa, Yesu ye ngeu to watoonrau to iyon bodbodaan pa Maaron ve iit tamtoghon irau sawa isob. *Mbo 110:4*

⁴ Aghita. Ngar to timbuud Abaram igham pa Melkizedek, nene ipatoon ghiit ighaze Melkizedek, ye iza tiina kat. Pasa, mbeb to tila tigham malmal ve tiyou di tinim ne, Abaram ivalag di tinim ndou saangul, ve ighur ndou eez inim Melkizedek le.

⁵ Yo, tagham ngar pa tutuun to muri Maaron igham pa yes Israela. Levi papaghu toni to tinim ndiran to watoonrau, ve ival tiina to Israel, yes sij ee moghon. Pasa, tisob tivot ila to Abaram. Eemoghon tutuun to Mose isaav tovene: Ival tiina to Israel irau tivalag mbeb todi tinim ndou saangul, ve tigham ndou eez pa yes to Levi papaghu toni. *Nam 18:21*

⁶ Melkizedek, ye ivot ila to Levi maau. Eemoghon mbeb to Abaram iyou di ne, tauto ivalag di tinim ndou saangul, ve ighur ndou eez ila inim Melkizedek le. Aghita. Abaram iza tiina kat. Pasa, Maaron imbua saveen tomani pa mbeb naol. Eemoghon Melkizedek iza tiina ilib pa Abaram. Tauto ipaloti ve ighur poia to Maaron iza toni.

⁷ Iit tawatag: Ngeu to igham palotiin pa tamtoghon, ye iza ilib pa yes to tigham palotiin ila toni.

⁸ Ve mbeb ite paam. Onoon, paitoon to tamtoghon tighurghur di ila pa Maaron, nene Levi papaghu toni to tiyouyou di tinim ledi. Eemoghon yes tikis uraat todi itaghoni taghoni gha ila ne maau. Tighamgham uraat ila le sawa to ighaze

timaat, ghoru tamtoghon papaghu tigham inadi. Eemoghon Melkizedek to Abaram igham mbeb pida pani, timbood saveen eta pa mateen toni maau. Tovenen ye inim ghilaloon pa Ngeu to inee mata iyaryaar irau sawa isob. *Hib 5:6, 6:20*

⁹⁻¹⁰ Ve iit irau tasaav taghaze: Sawa to Melkizedek ivot to Abaram, ve Abaram ivalag mbeb toni ve igham pida ila toni, nene Levi toman papaghu toni nimadi inee ila mbeb tonowen paam. Onoon sawa tonenen, tipoop Levi sone. Eemoghon muri, ye ivot ila to Abaram papaghu toni.

Yesu, ye ngeu to watoonrau inimale Melkizedek

¹¹ Muun, yes Israela tigham tutuun to Maaron, ve tineep ila tutuun tonowen samba. Tutuun tonenen isaav tovene: Levi papaghu toni moghon to Maaron ighur di pa uraat to watoonrau. Laak, ighaze uraat todi to watoonrau igharaat tamtoghon le tingalaan kat ila Maaron mata, pughu vena to Maaron isaav ighaze muri, ngeu ite to watoonrau pale ivot, ve igham uraat inimale Melkizedek. Ngeu tonowen, uraat toni inimale Aron ve papaghu toni maau. *Hib 8:7*

¹² Eemoghon ighaze Maaron ighur uraat to watoonrau ila tamtoghon ite nima, nene ipatoonra ighaze ye itoor tutuun toni wa. *Ro 10:4; Ga 3:24+; Hib 8:13*

¹³ Ngeu to watoonrau to nisasavia ne, nene Tiina toit Yesu. Ye ivot ila to Levi maau. Ye ivot ila to Yakop natu Yuda. Ve iit tawatag: Muun ve inim, paghu eta to Yuda ikis uraat to watoonrau maau.

¹⁴ Pasa, sawa to Mose ighur tamtoghon pa tigham uraat to watoonrau, ye isavia aliņa eta inarua Yuda papaghu toni maau. *Mt 1:1; Syg 5:5*

Maaron irabolin ataam munģina to tutuun pa ataam paghu

¹⁵ Saveeņ to nisasavia ne, ņgar tiam avaat ighami wa. Aazne, ņgeu paghu eez to watoonrau ivot wa. Ye inimale Melkizedek.

¹⁶ Tutuun to Mose isaav tovene: Yes to tivot ila to Levi moghon, ghoru tinim ndiran to watoonrau. Eemoghon Yesu inim ņgeu to watoonrau itaghon ataam tonowen maau. Ye inim ņgeu to watoonrau pasa, ye tapiri tiina kat, ve ineep mata iyaryaar irau sawa isob. Irau imaat muul maau.

¹⁷ Pasa, Maaron aliņa isavia ighaze:

“Yom ņgeu to watoonrau unumale Melkizedek. Ve yom pale uneep tovene itaghoni taghoni gha ila.” *Mbo 110:4; Hib 5:6*

¹⁸⁻¹⁹ Tutuun munģina, le tapiri irau to iuul tamtoghon maau, ve irau igharaat mbeb eta ivot deņja kat maau. Tauto Maaron irabolini pa ataam paghu to poia kat le ilib pa ataam munģina. [Ataam tonowen, nene Yesu tau.] Ye igham ghiit tala tagharau Maaron kat. Leso tagham nepoon poia to taghur mataad pani ne. *Ro 8:3+, 10:4; Ep 2:18; Hib 8:13*

²⁰ Sawa to Maaron ighur Yesu inim ņgeu to watoonrau, ye imbua saveeņ tomani, ve ipariaaņ saveeņ tonowen le iyaryaaņ kat. Eemoghon Levi papaghu toni, Maaron igham ņgar tovene pa todi eta maau.

²¹ Aghita. Maaron imbua saveeņ ariņa kat toman Yesu. Pasa, isaav pani ighaze:

“Ngeu Tiina, ye imbua saveen toman ghom, ve ipariaaŋa le iyaryaŋ kat. Irau itoor ngar toni muul maau. Yom ngeu to watoonrau, ve uraat tiom tonanan irau isob maau. Pale inepneep tovene, itaghoni taghoni gha ila.”

Mbo 110:4

²² Tovenen ataam paghu to aazne tataghoni leso itiŋa Maaron talup ghiit tanim ee moghon, nene le saveen mbuaan to poia kat. Ilib pa saveen to muun Maaron imbua toman yes Israela. Ve Yesu to iyoon pa saveen mbuaan paghu tonenen ve igham uraata, leso anona ivot. *Hib 8:6, 12:24*

Yesu, ye ngeu to watoonrau to irau igham mulin ghiit

²³ Muun, yes Israela ledi ndiran katindi to watoonrau. Tikis uraat todi isenŋeenga itaghoni ila ne maau. Pasa, tighamgham uraat ila le sawa to ighaze timaat, ghoru tamtoghon papaghu tigham inadi.

²⁴ Eemoghon uraat to Yesu, nene irau isob maau. Pasa, ye ngeu to watoonrau to inep mata iyaryaar irau sawa isob.

²⁵ Tovenen yes to tinarua Maaron ila Yesu iza, ye irau igham mulin di. Pasa, ye igham naghood ve inep igharau Maaron irau sawa isob, leso isun Maaron pa iuul ghiit. *Ro 8:34; 1Yo 2:1*

²⁶ Poia kat pa iit leed ngeu to watoonrau tovene. Ye irau iuul ghiit. Pasa, ye inimale iit tamtoghon samsamiaad to taan maau. Ye le sosor eta maau. Ye patabuan, ve ngar toni isob, nene ingalaan moghon. Ve Tama Maaron ighami iza ila ndug sambam, ve aazne iza ilib pa mbeb to naol ne. *2Kor 5:21; Hib 4:14+*

²⁷ Tovenen ye inimale daba pida to watoonrau maau. Pasa, yes tonowen, sawa isob tighamgham watoonrau pa tireu sosor to taudi muun. Ghoru tigham watoonrau pa sosor to tamtoghon pida. Eemoghon Yesu, ye le sosor eta pa igham watoonrau pani ne maau. Ve mbeb ite paam. Watoonrau to ye igham pa ireu sosor to iit tamtoghon, ye ighami pa ee moghon, ve isob. Watoonrau tonowen, ye ighami indeen sawa to iyokia tau ve imaat. *Hib 5:3, 9:12; 1Pe 3:18*

²⁸ Tamtoghon tisob to tighur di tinim daba to watoonrau itaghon tutuun to Mose ne, tapiridi imbool. Pasa, yes to taan. Tauto Maaron igham tutuun pa yes Israela, ve muri ghoru, ighur tau Natu inim ngeu to watoonrau. Ye inimale ndiran pida to watoonrau maau. Pasa, Maaron imbua saveen tomani, ve ipariaanja le iyaryaan kat. Ve ngar isob to Natu tonowen itaghoni, tauto ighami le iraua kat pa uraat toni. Ve ye pale ineep tovene itaghoni taghoni gha ila. *Hib 2:10, 5:8+, 7:24*

8

Krisi ineep toman Maaron izi sambam ve ighamgham uraat toni

¹ Saveen to nisasavia ne, pughu tovene: Aazne, iit leed daba poia eez to watoonrau. Ye ineep ila Maaron arianja nima waan igharau ina to ghamuun pooz to sambam we. *Mk 16:19; Ep 1:20; Hib 1:3*

² Ye ineep iloon ila mbeez patabuan to iyoon izi sambam, ve ighamgham uraat toni to watoonrau ila lolo to patabuan le patabuan kat. Mbeez tonowen, nene mbeez tau. Tamtoghon to taan

tipayoonda maau. Maaron tau ipayoonda.* *Hib 9:11,24*

³ Daba tisob to watoonrau, tighur di, lesu tighur paitoon to tamtoghon ila pa Maaron ve tigham uraat pa watoonrau todi. Daba toit to watoonrau tovene paam. Irau nima moghon ve ila to Maaron ne maau. Ye irau ikis mbeb eta ve ila tomani, lesu igham pani inim watoonrau. *Hib 5:1, 9:12*

⁴ Ighaze Yesu inepneep izi taan, ye irau inim ngeu to watoonrau maau. Pasa, watoonrau naol to tutuun to Mose isavia di, tamtoghona tineep pataghaan wa pa tigham uraat padi.

⁵ Eemoghon yes timbesmbees pa Maaron iloon ila mbeez to taan moghon. Mbeez tonowen, mbeb tau maau. Nene mbeez to iyon izi sambam we anunu moghon. Pasa, sawa to Mose ighaze ipayoon mbeez patabuan to Maaron izi ndug balim, Maaron isaav ariana pani ighaze: “Mbeez anunu to napatoona payom izi lolooz, matam kisini ve ugharaat mbeb tisob titaghoni.” *Igham 40:1+; Mban 7:44; Kol 2:17; Hib 10:1*

⁶ Ve aazne, uraat to watoonrau to Maaron ighuri ila Yesu nima, nene poia kat ilib pa uraat to watoonrau to muun. Ve ataam paghu to itina Maaron talup ghiit tanim ee moghon, tovene paam. Nene poia kat ilib pa ataam mungina, ve le saveen mbuaan popoiadi kat. Ataam paghu tonowen ivot ila uraat to Krisi. Pasa ye to iyon bodbodaan pa Maaron ve iit tamtoghon. *2Kor 3:6+; Hib 7:22*

* **8:2:** Sawa to yes Israela tineep izi lolooz Sinai pughu, tigharaat mbeez eez inim inadi to sunuun. Saveena ineeep ila Maaron Igham Mulin Yes Israela, ngat 25 ila 31 ve ngat 36 ila 40. Saveen waaro tonene, isavia mbeez tau to ineeep izi sambam.

⁷ Inimale ataam muŋgina tonowen poia kat, ve le patanjani eta maau, tone irau Maaron irabolini pa ataam paghu tonene maau. *Hib 7:11,18, 10:1*

⁸ Eemoghon Maaron ighita tovene: Moghon moghon tamtoghon toni tiyel pa ataam toni ve tighamgham sosor. Tauto ye isaav ighaze:

“Aloon. Sawa eta pale ivot, ghoru you naghur ataam paghu pa yes Israela ve yes Yuda,[†] lesu yeiŋa nilup ghei ninim ee moghon. *Yer 31:31+*

⁹ Ataam paghu tonene, pale ite pa ataam to naghuri pa nditimbudi. Muuŋ, sawa to nakis yes Israela nimadi ve naghreb di tipul Isip, you navotia ataam muŋgina tonowen padi. Eemoghon titaghoni kat maau. Tauto naghur murig padi.

¹⁰ Ataam paghu to pale naghuri padi, nene vene: Muri, you taug pale naghur tutuun tiou ineep ariana ila ngar todi ve nambooda ila lolodi. Ve you pale nanim Maaron todi, ve yes tinim tamtoghon tiou. *Ezek 36:25+; 2Kor 3:3; Hib 10:16*

¹¹ Sawa tonenen ighaze ivot, tamtoghon eta irau ipatoot ndita pa saveen tiou muul maau.

Ve tamtoghon eta irau isaav pa tonvetaz toni ighaze: ‘Oyai, yam awatag Maaron, ghoru poia!’ vene maau. Pasa, yes tisob pale tiwatag katin ghou. Yes to ledi izadi maau,

[†] **8:8:** Sawa to Kinik Solomon natu Reoboam ingin yes Israela, yes tivalag di tinim ru. Yes to tineep ila pa kagu, tiwaat di Israela. Ve yes to tineep ila pa daudau, tiwaat di Yuda. Eemoghon muri tilup di muul. Tauto sawa to Yesu, tiwaat di tighaze ‘Israel,’ ve tiwaat di ‘Yuda’ paam.

ve yes to izadi tintina ne paam. *Is 54:13; Yo 6:45*

¹² Ve you pale lolog isamin di ve nareua sosor todi isob ilale, ve matag ingali muul maau.”
Ro 11:27; Hib 10:17

¹³ Aghita. Ighaze Maaron isavia ataam paghu eta, nene ipatoon ghiit ighaze ataam to ivot muun, nene munjinaan ve igharau ighaze isob. Ataam tovene, mala maau pale ilale kat. *Ro 10:4; Hib 7:18*

9

Ataam munjina, irau igham ghiit tala tagharau Maaron maau

¹ Ataam to ivot muun, nene le tutuun naol to tisavia sunuun ngara. Ve ataam tonowen isavia mbeez patabuan to iyoon izi taan. *Igham 25-31, 40*

²⁻³ Mbeez tonowen, tipayoonda le isob, ghoru tin-daad uli tiina ila lolo, leso tirab motin lolo inim suruvu ru. Suruvu to ineep potla, nene tiwaata tighaze ‘ndug patabuan,’ ve mbeb ru tineep ila lolo. Eez, nene lam aia to tighurghur lam izala. Ve ite, nene ton to tighurghur mberet patabuan izala. Ve suruvu ite to uli tiina tonowen ipoona, nene tiwaata tighaze ‘ndug to patabuan le patabuan kat.’

⁴ Suruvu tonowen, artaal to tunuun naunaun vuzi popoia ineep iloon ila. Artaal tonowen, tigharaata pa gol. Ve Bokis to Saveen Mbuaan ineep iloon ila paam. Bokis tonowen, tipaak gol ila lolo ve muri, ve tighur mbeb pida tiloon tila. Eez, nene uur to tigharaata pa gol ve tighur aniiñ manna pida ineep iloon ila. Ve mbeb ite, nene titi to Aron to

isudud. Ve mbeb ite, nene yaam babanadi ru to tutuun saangul ineep ila. Tutuun tonowen, nene isavia ataam to yes Israela titaghoni leso lupuun todi toman Maaron ineep pooi. *Igham 16:33*

⁵ Ve tighur anela anunudi ru tizala bokis tonenen pogho ve bagedi ipoon avo. Anela anunudi tonowen tinim ghilaloon pa Maaron nguruba ve tapiri. Bokis tonenen avo, nene tiwaata tighaze 'ndug to rewaan sosor.' Eemoghon aazne, irau nila saveen tonene lolo maau.

⁶ Tigharaat mbeb naol tonenen, ve tipayoon di le isob, ghoru ndiran to watoonrau tipamundigin uraat todi. Moghon moghon, tilonloon tila mbeez patabuan suruvu to ineep potla, ve tighamgham uraat todi.

⁷ Ve daba todi enjeni moghon to irau iloon ila mbeez suruvu to patabuan le patabuan kat. Eemoghon ye iloon ila pa ee moghon pa ndaman enaena. Ve irau nima moghon ve iloon ila maau. Ye irau ikis mbeb eta sinji, ghoru iloon ila. Sawa to iloon ila, ye igham watoonrau pa tau sosor toni muun. Ghoru igham pa yes to tikankan ve tigham sosor. *Wkp 16:2-34*

⁸ Ngar to tighamghami ila mbeez tonenen lolo, Avuvu Patabuan ipatoon ghiit pani tovene: Sawa to mbeez tonenen iyondyood, ataam to taloon tala ndug patabuan ve tagharau Maaron, nene ivot ighazoon sone.

⁹ Ve mbeez tonenen ipatoon ngar to ivotvot pa sawa tonene ighaze yes to tighurghur paitoon ve watoonrau todi ila pa Maaron itaghon ataam mungina, ngar todi tonowen irau igham di tiyamaan di tighaze tingalaan kat ila Maaron mata ne

maau.

Hib 10:1+

¹⁰ Pasa, watoonrau tovene, toman tutuun naol to tisavia sa mbeb to irau taghani ve taghuni, ve ataam naol to ririwaan leso tanjalaan ila Maaron mata, nene mbeb to moghon. Irau igharaat lolood le injalaan kat ila Maaron mata ne maau. Tauto Maaron ighur ataam tonenen ighaze tataghoni ila le sawa to ye igharaat mbeb ve igham ataam paghu ivot, ghoru tapuli. *Ro 10:4; Ga 3:24+; Kol 2:16+*

Krisi sinj toni, nene inim ataam paghu pa itiņa Maaron talup ghiit

¹¹ Ve aazne, ataam paghu tonenen ivot ighazoon pasa, Krisi inim wa. Ye daba to watoonrau to inim ataam pait ve taghamgham mbeb popoia ila to Maaron.*

Pasa, ye iloon ila mbeez tau to iyoon izi sambam, ve ila peria to Maaron. Mbeez tonowen, poia le poia kat. Ilib pa mbeez to muun yes Israela tireii. Pasa, tamtoghon tireii pa nimadi maau, ve ineep izi taan maau. Ineep izi sambam. *Hib 4:14, 8:1+*

¹² Sawa to Krisi iloon ila mbeez suruvu to patabuan le patabuan kat, ye ila toman mekmek ma makau natu eta sinj maau. Ye ila toman tau sinj toni to imalinj inim watoonrau, ve ila ivot to Maaron. Tauto ireu sosor toit, ve igham mulin ghiit. Leso samia tapiri ikis ghiit muul sob, ve taneep mataad iyaryaar le alok. Uraat tonenen,

* **9:11:** Mbeb popoia tonene, nene mbeb tovene: Krisi igham ghiit tanjalaan kat ila Maaron mata, tovene iit irau tagharau Maaron. Ve taghita saveen mbuaan to Maaron anonja, ve izaad pa tagham nepoon poia toman Maaron izi ndug sambam.

Krisi ighami pa ee moghon, ve isob. Irau ighami muul maau.

Hib 7:27, 10:10+; 1Pe 1:19

¹³ Aghita. Muuŋ, ighaze mbeb eta igham tamtoohon tisami ila Maaron mata, nene titir mekmek ma makau tamoot eta sinji, ma avab to makau liva to yab ighani ne izala poghodi. Leso igham tinidi to potla ɲgalaan ve irau tisun pa Maaron muul.†

Nam 19:2-22

¹⁴ Ighaze venen, Krisi sinj toni ilib kat pa mbeb tonowen. Pasa, Avuvu Patabuan to inepneep irau sawa isob ne, tapiri ipaloti, ve iyokia tau ve imaat inim watoonrau pa Maaron, lesu ireu sosor toit. Watoonrau toni tonowen, poia le poia kat. Sosor eta ineep ila maau. Tovenen sinj toni le tapiri tiina. Irau imen lolood ve igham ghiit tayamaan tauud taghaze tanjalaan ila Maaron mata. Ve igham ghiit tapul ɲgar to ighereb ghiit pa mateen, lesu tambees pooi pa Maaron mata yaryaara.‡ *Tit 2:14; Hib 10:22; 1Yo 1:7*

¹⁵ Tovenen Krisi, ye ɲgeu to iyoon bodbodaan pa Maaron ve iit tamtoohon, ve igharaat ataam

† **9:13:** Yes Yuda tigham ɲgar tovene: Ighaze tikis mateen eta, ma tighan mbeb pida, ma kolekole igham di, ma ndiliva tighita kaiyo todi, nene igham di tisami ila Maaron mata. Tovenen yes irau tigham watoonrau, ma ɲgar pida, lesu tigharaat taudi ve tinidi to potla ɲgalaan ila Maaron mata muul. Saveenja ineep ila Wok Pris 11:1+, 12:1+, 13:1+. Ndaman isob, sawa tiina to rewaan sosor ighaze ivot, nene daba to watoonrau itir mekmek ve makau ndinatudi sinjidi izala yes Yuda poghodi. Leso igham tamtoohon tisob tinjalaan ila Maaron mata muul. Ughita Wkp 16:1+. ‡ **9:14:** Ataam ite to tator saveen to ipasob saveen waaro tonene, nene vene: 'igham ghiit tapul ɲgar naol to sunuun to iuul ghiit maau, ve tambees pooi pa Maaron mata yaryaara.'

paghu pait, leso itinja Maaron talup ghiit tanim ee moghon. Yes to timalaan pa tutuun to ataam mungina, mateen toni ipasob sosor todi atia, ve igham mulin di. Leso tamtoghon tisob to Maaron ipoi di tinim le, tigham nepoon poia itaghon saveen mbuaan toni. Nepoon tonowen pale iseenja itaghoni taghoni gha ila. *Lu 22:20; Ro 3:25+; 1Tim 2:5*

Krisi sinj toni ipariaan saveen mbuaan paghu to Maaron

¹⁶⁻¹⁷ Iit tawatag: Ighaze tamtoghon timbua saveen, yes irau tirab mbab eta imaat inim watoonrau. Leso tipariaan saveen mbuaan todi. Ve ighaze tirab mbab eta imaat maau, nene pale saveen mbuaan todi iyaryaan maau. § *Mbnp 15:9+; Mt 26:28*

¹⁸ Tauto sawa to Maaron imbua saveen toman yes Israela izi lolooz Sinai pa tilup di tinim ee moghon, sinj to ngai imalinj.

¹⁹⁻²⁰ Sawa tonenen, Mose iwaat tutuun to Maaron pa yes Israela le isob, ghoru igham sinj to makau ve mekmek, ve itoora toman ya. Ve igham sipsip oro kaviaanja ve ikau ila ai isop boga, ve ipazugi izila sinj tonowen. Ghoru itiri izala rau to tutuun to Maaron ineep ila, ve itiri izala Israela tisob

§ **9:16-17:** Ataam ite to tator saveen waaro ru tonene nene vene: Ighaze ngeu eta igham ngar pa mateen toni ve ighaze irei mbab toni, ye pale isaav ghazonja: muri, sei pale igham sa mbab. Nene inim saveen mbuaan toni. Saveen tonowen pale iyon tovene le sawa to ye imaat, ghoru tirei mbab toni itaghon saveen tonenen. Ve ighaze ye inepneep mata iyaryaan sone, nene irau titaghon saveen tonenen maau. Saveen tonenen pale iyondyood le irau ngeu tonenen imaat, ghoru ananja toni ivot.

poghodi paam, ve isaav padi ighaze: “*Ataam to ataghoni leso yamḡa Maaron alup gham anim ee moghon, tauto ye isavia payam ve alooḡa wa. Ve yam ambua saveeḡ tomani aghaze ataghoni. Siḡ tonene, nene pa ipariaaḡ saveeḡ to aazne yam ambua toman Maaron.*” *Igham*

24:8

²¹ Ve Mose itaghon ḡgar raraate pa mbeez patabuaḡ to Maaron toman mbeb to suḡuuḡ to tineep ila lolo ne paam. Igham siḡ ve itiri izala poghodi.

²² Pasa, saveeḡ to ineep ila tutuuḡ to Mose, isaav tovene: Ighaze siḡ imaliḡ, nene irau igham mbeb tisob tiḡgalaḡ ila Maaron mata. Mbeb eḡaerḡa moghon to maau. Ve ighaze siḡ imaliḡ maau, nene Maaron irau ireu sosor maau. *Wkp 17:11; Ep 1:7*

Krisi igham watoonḡrau pa ee moghon, ve isob

²³ Mbeez patabuaḡ to yes Israela tireii, toman mburuguuḡ to tineep ila lolo, nene mbeb tau maau. Nene mbeb to tineep izi sambam ne anunudi moghon. Tauto tirabrab ḡgai tinim watoonḡrau, leso siḡ to mbeb tonowen igham mbeez toman mburuguuḡ to tineep ila lolo ne tiḡgalaḡ ila Maaron mata. Eemoghon mbeb tau, nene tineep izi sambam. Tauto ḡgar tovene irau igham di tiḡgalaḡ maau. Ledi watoonḡrau to poia kat le ilib pa siḡ to ḡgai, ghoru igham di tiḡgalaḡ ila Maaron mata. *Hib 8:5*

²⁴ Pughu tonene to Krisi ilooḡ ila mbeez patabuaḡ to tamtoghon tigharaata pa nimadi ne maau. Pasa, mbeez tonowen, nene mbeez tau maau. Nene mbeez to ineep izi sambam we anunu moghon. Ye igham naghooḡ ve ilooḡ ila ndug

sambam lolo kat. Tauto aazne, ineep toman Tama Maaron, ve iuluul ghiit. *Ro 8:34; Hib 4:14, 8:1; 1Yo 2:1*

²⁵ Yes Yuda, ndaman to naol ne, daba to watoonrau ilonloonj ila mbeez suruvu to patabuanj le patabuanj kat. Ve sawa to iloonj ila, ye ila toman tau sinj toni maau. Ye ilala toman sinj to ngai. Eemoghon Krisi, ye igham watoonrau pae katindi maau. Iyokia tau ve imaat pa ee moghon, ve isob.

²⁶ Ve inimale ye itaghon ngar to daba to watoonrau to taan titaghoni, tone sawa to Maaron ighur sambam ve taan ve inim, ye ighamgham yabyabuunj ve mateenj. Eemoghon maau. Aazne, nene sawa to Maaron ipasob uraat toni. Tauto Krisi izi inim taan, ve iyokia tau ve imaat, leso ireu sosor toit ve ipasob samia tapiri. Ve uraat tonenen, ye ighami pa ee moghon ve isob. Irau ighami muul maau. *Hib 7:27; 1Pe 3:18*

²⁷ Tamtoghon tisob pale timaat pa ee moghon ve isob, itaghon Maaron ngar toni. Ve muri, gabizoonj todi pale ivot ve tigham atia todi. *Mbnp 3:19; 2Kor 5:10; Syg 20:11+*

²⁸ Krisi tovene paam. Ye iyokia tau ve imaat inim watoonrau pa ee moghon, ve isob. Ye imbaad patajani tiina pa ireu sosor to tamtoghon katindi. Ve muri, ye pale imuul izi inim. Sawa tonenen, ye irau igham uraat muul pa rewaanj sosor to tamtoghon maau. Ye pale inim pa igham mulin yes to tighur matadi pani ve tisanajani. *Mt 26:28; Ro 6:10; Pil 3:20; Tit 2:13*

10

Mateenj to Krisi, nene watoonrau kat

¹ Watoonrau to tigham di titaghon tutuun to Mose, nene mbeb tau maau. Nene tinimale mbeb popoia to muri tivot ne anunudi moghon. Aghita. Ndaman to naol ne, ndiran to watoonrau tino-knok rabuun ngai pa tireu sosor to tamtoghon. Eemoghon yes to tighaze tila tigharau Maaron ve tisun pani, watoonrau tovene irau igham di tineep denjadi kat ila ye mata ne maau. Maau le maau kat.

² Ve inimale watoonrau tovene irau ireu sosor todi isob ilale, ve igham di tineep ngalanjadi kat ila Maaron mata irau sawa isob, tone tiyamaan di tighaze ledi sosor maau, ve tipul ngar to rabuun ngai pa tireu sosor todi. *Kol 2:17; Hib 7:19; 9:9+*

³ Eemoghon maau. Watoonrau to ndaman to naol tighamham di, nene tigham di matadi ingalngal sosor todi.

⁴ Pasa, makau ma mekmek sinjidi, nene irau ireu sosor to tamtoghon maau.

⁵ Tauto sawa to Krisi izi inim taan, ye isaav pa Maaron ighaze:

“Ngar to rabuun mbeb inim watoonrau toman ngar to nigham aniin pa nipait ghom, yom lolom pani maau.

Eemoghon yom ugharaat anonag pataghaan wa. Leso inim inag pa naneep ila.* *Mbo 40:6+, 50:9*

⁶ Ve ngar to ghuruun mbeb izala artaal leso yab ighan suvuni, toman ngar to rabuun mbeb pa rewaan sosor to tamtoghon, nene paam, irau lolom maau.

* **10:5:** Saveen tonene isavia sawa to Maaron Natu izi inim taan ve inim tamtoghon.

⁷ Tauto nasaav naghaze: ‘Maaron, ughita. You taug tonene. You nanim pa nataghon lolom. Ngar to naghaze naghami, saveeņa timbooda pataghaan wa.’ ”

⁸ Aghita. Papazogi, Krisi isavia watoonrau to tighamgham di titaghon tutuun to Mose ighaze: “Ngar to rabuun mbeb inim watoonrau, toman ngar to nigham aniin pa nipait ghom, ve ngar to ghuruun mbeb izala artaal lesu yab ighan suvuni, ve ngar to rabuun mbeb pa rewaan sotor to tamtoghon, ngar naol tonene, yom lolom padi maau. Ngar tovene, nene irau lolom maau.” *Hos 6:6; Mt 9:13, 12:7*

⁹ Ghoru isaav muul ighaze: “Maaron, ughita. You taug tonene. You nanim pa nataghon lolom.” Saveeņ tonene, ngara tovene: Ataam mungina to watoonrau to ye isavia muun, ye irab motini, ve irabolini pa ataam paghu wa.

¹⁰ Aghita. Yesu Krisi iyokia tau itaghon Maaron lolo, ve imaat pa ee moghon pa ireu sotor toit. Tauto aazne, ye igham ghiit tanim tamtoghon patabuaņa to Maaron wa. *Yo 17:19; Hib 9:28, 13:12*

¹¹ Ndag to naol ne, ndiran to watoonrau tiyondyood ila artaal nagho, ve tinoknok ghamuun watoonrau raratedi moghon. Eemoghon watoonrau todi naol tonowen irau tireu sotor eta maau.

¹² Ve Krisi, ye igham watoonrau ee moghon kat pa ireu sotor to tamtoghon, ghoru iza ila pa sambam, ve mbole izi ila pa Tama Maaron nima waan. Watoonrau toni tonowen, tapiri inepneep irau sawa isob. Muun, aazne, ve itaghone taghoni gha ila. *Mk 16:19; Kol 3:1; Hib 1:3, 8:1*

¹³ Tovenen sawa tonenen ve inim, Krisi ineep izi sambam, ve isasañan. Ighaze Maaron itatan koia le tapiridi isob, ghoru ye ana ivazag di ila aghe samba. *Mbo 110:1; Hib 1:13*

¹⁴ Watoonrau ee moghon kat to Krisi ighami, nene igham tamtoghon toni tineep denjadi kat ila Maaron mata. Ve pale tineep tovene itaghoni taghoni gha ila. Ve aazne, ye ighamgham uraat padi leso titaghon katin ngar patabuan.

¹⁵ Avuvu Patabuan paam ipariaan ghiit pa taghur ila saveen tonene. Pasa, muun, ye isaav ighaze:

¹⁶ “Ataam paghu to pale naghuri pa yes Israela, nene vene:

Muri, you pale naghur tutuun tiou ineep tunia ila lolodi, ve nambooda ila ngar todi paam.”

Yer 31:33+; Hib 8:10+

¹⁷ Ghoru isaav muul ighaze:

“Ve ngar todi samsamia naol to tiyel pa tutuun tiou, you pale nareu di tilaledi, ve matag ingal di muul maau.” *Yer 31:34*

¹⁸ Tovenen aghita. Ighaze Krisi ireu sosor toit isob ilale, nene watoonrau to rewaan sosor paam, le uraat muul maau.

Taghur ila to Krisi ariana, ve tala tagharau Maaron

¹⁹⁻²⁰ Sawa to Yesu imaat ve imundig muul, ye iloon ila mbeez to ndug sambam. Ve uli to ipon-poon ndug patabuan, ye ireep motini, ve mal-mali ila peria to Maaron. Tauto aazne, mbeb eta ipoon ghiit pa Maaron muul maau. Tovenen yam tonvetaz, iit tamatughez pa taloon tala ndug to patabuan kat, ve tala peria to Maaron malep.

Pasa, siŋ to Yesu igharaat ataam paghu pait wa. Ataam tonowen, nene ye tau. Pasa, ye ineep mata iyaryaar ve iuluul ghiit. *Mt 27:51; Yo 14:6; Ep 2:18*
²¹ Aazne, iit leed ngeu tiina eez to watoonra. Ye daba to iŋgin ruum to Maaron. Ruum tonene, nene iit tamtoghon toni. *Hib 4:14*

²² Tovenen tala tagharau Maaron toman lolood ee moghon, ve taghur ila toni ariana taghaze ye irau iuul ghiit. Pasa, Maaron itir Yesu siŋ toni izala poghood, ve taririu pa ya ngalaana wa. Tovenen ngar toit samia to muun igham ghiit tayamaan tauud taghaze tasami ila Maaron mata, nene ye ireua isob ilale, ve igham ghiit tangalaan kat wa. *Ezek 36:25; Ep 5:26; Hib 9:14*

²³ Iit taghur ila saveen mbuaan to Maaron to ighaze ye pale igham nepoon poia pait. Tauto taghurghur mataad pa nepoon poia tonowen, ve tavovotia saveena pa tamtoghon. Saveen mbuaan toni tonowen, lolood ru pani malep. Taghur ila ariana ve takisi tunia. Pasa, Ngeu to imbua saveen tonenen, ye itataghon saveen toni. *1Kor 1:9; 1Tes 5:24; Hib 3:6*

²⁴ Ve takaal ataam pa tapamundigin nditaad, leso iit tasob lolood pa tamtoghon ve tagham poian di, ve tagham uraat popoiadi naol. *Hib 3:13*

²⁵ Ve ngar to talup ghiit pa sunuun, nene tapuli malep. You nasavia saveen tonene pasa, tamtoghon tiam pida naghodi perperia pa lupuun tiam maau. Tovenen matamim iŋgal ve alup gham ve awapalotin gham. Pasa, sawa to Tiina toit, nene inim igharau wa. *Mban 2:42; Ro 13:11; Kol 3:16*

Ighaze taghur muriid pa Krisi, nene leed ataam

muul maau

²⁶ Aloon. Ighaze taloon saveen onoon to Krisi ve ngar toit ighazoon pani, eemoghon muri ngar toit iyaryaan muul taghaze tanok ghamuun ngar samia, nene pale leed watoonrau ite paam pa ireu sosor toit maau. *Hib 6:4+; 2Pe 2:20+*

²⁷ Ighaze tagham tovene, iit leed ataam eta muul maau. Tovenen matughezaan tiina pale igham ghiit ve tanepneep, ve tasaan moghon pa gabizoon to Maaron ve atia to pale ighuri pait. Atia tonowen, nene yab tiina to pale ighan yes to tizoor Maaron. *2Tes 1:8+; Hib 12:29; Syg 20:15*

²⁸ Agham ngar pa tutuun to Mose. Tutuun tonowen, ariana kat. Ighaze ngeu eta mata velegini ve iyel pani, ve tamtoghon ru ma tol tighita ve tipariaan saveen tighaze ye igham ngar tovene, nene ye pale imaas. Irau lolodi isamini maau.

²⁹ Laak, ighaze ngar tovene ivotvot pa yes to matadi velegin tutuun to Mose, nene pale vena pa tamtoghon to ighaze mata velegin Maaron tau Natu? Ye pale igham atia to samia le samia kat. Onoon, Krisi sinj toni imalinj, leso ipariaan saveen mbuaan to ataam paghu, ve igham ngeu tonenen inim Maaron le. Eemoghon ye mata velegin sinj patabuan to Krisi inimale mbeb sorok, ve avo samia pa Maaron Avuvu to inim ataam pa poia to Maaron iza toit. *Lo 32:35+; Hib 2:2+, 12:25*

³⁰ Iit tawatag Ngeu to isaav ighaze:

“Uraat to yatuun ngar samsamia to tamtoghon, nene uraat tiou. Taug pale naghur atia padi.” *Lo 32:35; Ro 12:19*

Ve saveeņ toni waaro ite isaav tovene: “*Ngeu Tiina pale ingabiiz tamtoghon toni ve ighur atia padi.*”
Mbo 50:4, 135:14

³¹ Tovenen iit tamatughez pa Maaron mata yaryaara. Pasa, ye nima mala. Ighaze ikis ghiit ve ighur atia pait, nene pale tasami le tasami kat. *Lu 12:5*

Tayoon ariana pa badooņ patani

³² Matamim ingal imuul ila pa muuņ, sawa to Maaron ipaghazonan gham pa varu poia. Sawa tonenen, tamtoghon tighur patani tiina kat payam pasa, yam ataghon Kriši. Eemoghon yam apul ghurla tiam maau, ve ayoon ariana pa badooņ patani. *Pil 1:29+*

³³ Sawa pida, tipayoon gham ila ival tiina matadi, ve tipiyaav saveeņ velegiin payam, ve tigham samin gham. Ve sawa pida, tigham ngar tovene pa nditamim paam. Tauto lolomim isamin nditamim tonanan, ve ayoon toman di pa badooņ patani todi tonowen.

³⁴ Ve sawa to tikis nditamim pida ve tighur di tilooņ tila ruum to yabyabuun ne paam, lolomim isamin di ve auul di. Ve sawa to tamtoghon tilat ve tiyou mbeb tiam tinim ledi, yam lolomim poia moghon. Pasa, awatag aghaze yam lemim mbeb poia to ilib kat pa mbeb tiam to tiyou di ne. Mbeb tonowen, nene mbeb tau, ve inee le alok. *Mt 6:20, 25:36; Hib 13:3; 1Pe 1:4+*

³⁵ Tovenen ngar tiam to amatughez maau ve ayoon ariana pa ghurla tiam, yam apuli malep. Pasa, ighaze akis ngar tonanan, nene pale aghita atia tiina to poia kat. *Mt 5:11+*

³⁶ Tovenen yam ayoon ariana, ve ataghon Maaron lolo. Leso aghita saveen mbuaan toni anoña. *Lu 21:19; Hib 12:1; Syg 13:10*

³⁷ Pasa, Maaron saveen toni isaav tovene:

“Ngeu to ighaze inim ne, mala maau pale inim. Irau izuar maau.

³⁸ Ve tamtoghon tiou to titaghon ngar denja, nene pale ghurla todi igham pooz pa nepoon todi.†

Eemoghon ighaze tamtoghon eta imatughez, ve lolo ighur ighaze ipul muri payou, nene pale lolog poia pani maau.” *Hab 2:3+; Ro 1:17*

³⁹ Ve iit animale yes to timatughez, ve tipul muridi pa Maaron ve tilaledi ne maau. Iit tamtoghon to takis ghurla toit tunja, lesa taneep mataad iyaryaar le alok.

11

Ngar to taghur ila

¹ Ngar to taghur ila, nene vene: Mbeb popoia to taghur mataad pani, lolood ru pani maau, ve ngar toit iyaryaan taghaze mbeb tonowen pale tivot. Ve mbeb to aazne taghita di pa mataad maau, ngar toit iyaryaan taghaze onoon kat mbeb tonowen tinepneep. *Ro 8:24+; 2Kor 4:18, 5:7*

² Nditimbuud to muun, ghurla todi iyaryaan tovene. Tauto Maaron lolo poia padi ve ipait di.

³ Ghurla toit, to igham ghiit taghilaal taghaze: Maaron isaav moghon, ve sambam ve taan toman

† **10:38:** Ataam ite to tator saveen waaro tonene, nene vene: “Tamtoghon tiou to tineep denjadi ila matag, nene pale tighur ila ve tigham nepoon poia inim tiou.”

mbeb to naol ne tivot. Tovenen mbeb tisob to aazne taghita di ne, Maaron igharaat di pa mbeb eta to iit irau taghita pa mataad ne maau. *Mbnp 1:1+; Mbo 33:6+; 2Pe 3:5*

Ghurla to Abel, Enok ve Noa

⁴ Muun, Abel ighur ila to Maaron. Tauto igham watoonrau poia le ilib pa watoonrau to togha Kain. Ghurla toni tonowen, tauto igham Maaron lolo poia pani ve watoonrau to ye igham pani, ve ipaiti ighaze ye ngeu denja eez. Tovenen onoon, Abel imaat wa. Eemoghon kamos to ghurla toni, nene inimale Abel isavsaav pait sone. *Mbnp 4:4+; Hib 12:24*

⁵ Enok ighur ila to Maaron. Tauto imaat maau, ve Maaron ighami iza ila sambam. Muri, tamtooghon tikaala le maau. Pasa, Maaron ighami iza ila wa. Ve sawa to Enok inepneep izi taan, tipait varu tighaze Maaron lolo poia pani. *Mbnp 5:24*

⁶ Eemoghon ighaze taghur ila to Maaron maau, nene irau ye lolo poia pait maau. Pasa, tamtooghon to ighaze ila igharau Maaron, ye irau ighur ila ighaze Maaron inepneep ve ighamgham atia popoia pa yes to tizuaria di pani.

⁷ Noa ighur ila to Maaron ve imatughez pani. Tovenen sawa to Maaron isavtarani pa patanani to ighaze ivot, ye itaghon Maaron aliya ve igharaat waan. Onoon, sawa tonenen, tamtooghon tighita patanani tovene ivot ndag eta sone. Eemoghon Noa ighur ila Maaron aliya, tauto iuul tau toman azuwa, ve ndinatu toman ndizwadi, ve tineep pooi. Tilaledi maau. Ngar to ye ighami, nene ipatoon ngar samia to tamtooghon to tineep izi taan pa sawa tonenen ivot ighazoon. Ghurla

toni tonowen, tauto Maaron ighita ighaze ye ngeu denja. *Mbnp 6:13+; Ro 3:22*

Ghurla to Abaram

⁸ Sawa to Maaron ipoi Abaram, ye isaav pani ighaze ipul ndug toni, ve ila pa taan to ye ighaze igham pani. Onoon, sawa tonenen, Abaram ikankaan pa sa ndug to pale ila ineep pani. Eemoghon ye ighur ila to Maaron. Tauto iloon aliņa, ve imundig ipul ndug toni ve ila. *Mbnp 12:1+*

⁹ Abaram ighur ila. Tauto ineep inim loom izi taan to Maaron imbua saveeņ pani. Ye le ruum tau maau. Ipapayoon mbeez moghon, ve inepneep ila. Ve muri, natu Isak ve timbu Yakop titaghon ngar raraate. Ve saveeņ mbuaaņ to Maaron igham pa Abaram, saveeņ ee moghon, tauto ye isavia padi paam.

¹⁰ Abaram ineep tovene pasa, ye ighur mata pa ndug tiina to Maaron igharaata itaghon tau ngar toni. Ndug tonowen, pughu ariņa, ve ineep tovene irau sawa isob.* *Hib 12:22, 13:14; Syg 21:2*

¹¹ Abaram ighur ila. Tauto Maaron tapiri iza to yesuru Sara ve tipoop. Onoon, yesuru tinim ndolman watwaat, ve sawa todi to popaaņ isob wa. Eemoghon Abaram ighur ila ighaze Maaron itaghon saveeņ mbuaaņ toni. Tauto ighita saveeņ tonowen anoņa. *Mbnp 17:19, 21:2; Ro 4:18+*

¹² Tovenen aghita. Abaram, ye ngeu ee moghon kat, ve inim olman waat wa. Eemoghon yesuru azuwa Sara tipoop, ve tamtoghon to tivot ila toni, yes katindi kat. Irau tanin di maau. Pasa, timasa

* **11:10:** Ndug tiina tonene, nene ndug sambam.

tinim naol tinimale pitum to sambam paronjania, ve magargaar to naari. *Mbnp 15:5, 22:17*

¹³ Yes tisob tonowen, ghurla todi igham pooz padi le irau mateenj todi. Onoon, saveenj to Maaron imbua toman di, yes tighita anonja maau. Pasa, sawa to saveenj tonowen anonja ivot, nene inepneep mala sone. Eemoghon lolodi poia pa saveenj mbuaanj to Maaron inimale tighita anonja wa. Ve tivotia taudi tighaze: “Taan, nene ndug tiei kat maau. Nepoonj tiei to taan, nene nineep ninim loomba moghon. Pasa, ndug tiei kat, nene sambam.” *Mbnp 23:4; 119:19; 2Kor 5:7*

¹⁴ Tamtoghon to tisaav tovene, tipatoonj taudi tighaze ndug todi eta inepneep. Tauto tikalkaala sone.

¹⁵ Ve inimale tigham ngar tiina pa taan todi to tipuli, ve tikausim pani, tone yes irau timuul tila.

¹⁶ Eemoghon maau. Pasa, ngar todi iyaryaan pa ndug ite to poia kat ilib pa ndug to tipuli. Ndug tonowen inep izi sambam. Tauto sawa to tipoi Maaron tighaze ye Maaron todi, ye maya pa saveenj todi tonowen maau. Pasa, ndug to tighur matadi pani, ye ighuri padi pataghaan ve isasaan di. *Pil 3:20; Hib 13:14*

¹⁷⁻¹⁸ Abaram ighur ila to Maaron. Tauto sawa to Maaron itoova ve isaav pani ighaze irab natu ee moghon Isak imaat inim watoonjrau, ye ighaze itaghon Maaron alinja. Onoon, muunj Maaron imbua saveenj tomani ighaze: “Papaghu tiom kat pale tivot ila to natum Isak.” Eemoghon Abaram injuruut natu tonowen maau. *Mbnp 21:12, 22:1+; Yems 2:21+*

¹⁹ Pasa, ye igham ngar tovene: Ighaze Isak imaat,

nene Maaron irau ipamundigini pa mateen. Ve ngar to ivot pa Isak, nene inimale ye imaat wa, eemoghon Maaron ipamundigini pa mateen, ve ighuri imuul ila to tama Abaram.†

Ghurla to Isak, Yakop, ve Yosep

²⁰ Isak ighur ila to Maaron. Tauto ighur poia to Maaron iza to ndinatu ru, Yakop ve Esau, ve isaav pa mbeb to muri pale ivot padi. *Mbnp 27:27+, 27:39+*

²¹ Yakop ighur ila to Maaron. Tauto sawa to iyamaan tau ighaze mateen toni igharau, ye ighur poia to Maaron iza to Yosep ndinatu ru le isob, ghoru iwat aze ila titi toni, ve isun pa Maaron. *Mbnp 48:15+*

²² Yosep paam ighur ila to Maaron. Tauto sawa to iyamaan tau ighaze mateen toni igharau, ye isaav pa yes Israela ighaze muri Maaron pale igham di tipul Isip. Ve isaav padi pataghaan pa tua. Leso sawa to timundig, matadi ingal tua, ve tighami tila ve titavia izi taan Kanaan. *Mbnp 50:24*

Ghurla to Mose

²³ Mose tama ve tina tighur ila to Maaron. Tauto sawa to tipooa, timatughez pa kinik to Isip aliņa maau, ve tingooz natudi tonowen irau kaiyo tol. Pasa, tighita inimale ndipain pida maau. Nagho poia le poia kat. *Igham 2:2+*

²⁴ Mose paam ighur ila to Maaron. Tauto sawa to itub inim olman, lolo pa tamtoghon tiwaata tighaze ye kinik to Isip natu liva natu malep.

† **11:19:** Ngar to ivot pa Isak, nene inim ghilaloon pa mundigiin to Krisi.

²⁵ Ye irau itaghon yes Isipa ve yesja tigham ngar samsamia naol to uliid to tigham lolood poia rismoghon ve isob. Eemoghon lolo pa ngar tovene maau. Ye ighita ighaze ye irau ila toman Maaron tamtoghon toni ve yesja timbaad patañani, ghoru poia.

²⁶ Ve ye igham ngar tovene: Ighaze tamtoghon tipamayanini ve tighur patañani pani inimale tigham pa Mesia, nene poia. Pasa, ye ighur mata pa atia poia to muri pale Maaron igham pani. Ve ighita ighaze atia tonowen, nene ilib kat pa yes Isipa mbaliin todi to naol ne. *Hib 10:33+, 13:13*

²⁷ Mose ighur ila. Tauto imundig ve ipul Isip. Ye imatughez pa malmaliin to kinik maau. Onoon, iit tamtoghon irau taghita Maaron pa mataad maau. Eemoghon Mose, ye iyoon ariana inimale ighita katin Maaron pa tau mata. *Igham 2:10+; 2Kor 4:18*

²⁸ Mose ighur ila to Maaron. Tauto ipamundigin ngar to Pasova, ve isaav pa yes Israela tipel sin ila ataam todi todi. Leso anela to Maaron imbaana ila pa irab yes Isipa ndinatudi aidaba, igham mbeb eta padi sob. *Igham 12:21+*

²⁹ Ival tiina to Israel tighur ila to Maaron. Tauto sawa to timbut Te Kaviaana ve tivoool tila pa dige ite, yes tilaagh inimale tilaagh izala taan maasa. Eemoghon sawa to yes Isipa titoova pa titaghon di, te ipol imuul inim izala poghodi, le tisob tighun te ve timatmaat. *Igham 14:21+*

³⁰ Ival tiina to Israel tighur ila. Tauto tilaagh luvutin ndug tiina Yeriko irau ndag liim ve ru. Ghoru didiin ariana to tiluvutin ndug, tisob tipolpol tizi. *Yos 6:1-20*

³¹ Reap, ye liva to ataam. Eemoghon ighur ila to Maaron. Tovenen sawa to Yosua imbaan yes sandiri tila pa tighita ndug, Reap igham di tila ruum toni, ve ingin poian di. Tauto sawa to yes Israela tirab ival tiina to Yeriko to tizoor Maaron aliņa, yes tirab Reap maau. Tipuli ineep. *Yos 2:1+*, *6:22+*; *Yems 2:25*

Tamtoghon pida to tighur ila ariņa

³² Poia. Irau nayoot saveen ila mala maau. Pasa, leg sawa to nasavia kamos pa Gideon, Barak, Samson, Yepta, David, Samuel, ve yes propeta to muun tivotia Maaron aliņa ne maau. *Het 4-16*; *1Sam 1:1-1King 2:12*

³³ Ndiran tonowen tighur ila to Maaron. Tauto ye ipalot di, ve pida tiparab le tilib pa kinik pida to tingin taan tintina. Ve yes pida to muun tingin yes Israela, tipalot tamtoghon pa titaghon ngar denja. Ve tamtoghon todi pida tighita saveen to Maaron imbua toman di ne anoņa. Ve pida, laion tirau tighan di maau. *Dan 6:1+*

³⁴ Pida, tipiyaav di tila yab tiina lolo. Eemoghon yab le tapiri irau to iwaghamun di maau. Ve pida, Maaron ipaghau di pa buza mata. Pida, tapiridi imbool. Eemoghon Maaron ipalot di, tauto tiparab ariņa le tilib pa ndaaba to ndug pida, ve tinaan koiadi tonowen tila. *Het 7:19+*; *1Sam 17:51*; *Dan 3:1+*

Tamtoghon pida, ghurla todi ipalot di, tauto tiyoon ariņa pa badoon patanani

³⁵ Ve ndiliva pida, Maaron ipamundigin ma-teenņa todi. *1King 17:21+*; *2King 4:32+*

Tamtoghon pida, koiadi tighur yabyabuun padi ve tisaav padi tovene: “Ighaze yam apul murimim pa Maaron tiam, nene pale nipul gham ala.” Eemoghon yes tiloon alinadi maau, ve tiyoon ariana pa badoon patajani. Pasa, tighur ila tighaze Maaron pale ipamundigin di pa mateen, ve tigham nepoon poia kat to ilib pa patajani naol to timbaad di izi taan.

³⁶ Ve pida, tamtoghon tiwaninizon di ve tilos di. Pida, tikau nimadi ve aghedi pa sen, ve tighur di tiloon tila ruum to yabyabuun lolo. *Yer 20:2*

³⁷ Ve pida, tirab di pa yaam. Pida, tighorot di pa so tinim suruvu ru.‡

Ve pida, timbut di pa buza timatmaat. Tamtoghon pida tineep sami. Mbolaan igham di, ve ledi nonogiina poia eta maau. Tindud di pa sipsip ma mekmek ulidi moghon. Ve tamtoghon tigham samin di, ve tighur patajani naol padi. *1King 21:13; 2Sto 24:21; Mban 7:58, 14:19*

³⁸ Ndiran tonowen, tamtoghon popoiadi kat. Tinimale ival tiina to titaghon ngar to taan ne maau. Ndiran tovene, taan tonene poia irau to tineep pani ne maau. Aghita. Nepoon todi, poia maau. Ve ledi inadi poia eta to nepoon maau. Tauto tiwalaghaagh taghon ndug balim ve lolooz. Ve tinepneep iloon ila taan ve yaam sambudi. *1King 18:4, 19:9*

³⁹ Tamtoghon tisob to nasavia di ne, tighur ila to Maaron. Tauto Maaron lolo poia padi ve ipait di. Eemoghon sawa to tineep izi taan, todi eta ighita saveen mbuaan to Maaron anona maau.

‡ **11:37:** Kamos eez to yes Yuda isaav tovene. Muun, tighorot propet Isaia inim suruvu ru.

40 Pasa, muun kat, Maaron lolo ighur pataghaan ighaze igham mbeb poia eez[§] to pale iuul ghiit tasob. Leso tasob taneep denjaad kat ila mata. Ve ye lolo pa yes tighami muun malep. Ye ighaze ilup ghiit toman di, ve iit tasob taghami raraate.

12

Yesu ipatoon ghiit pa ngar to tayoona ariana

¹ Ival tiina to muun to ngaramus nasavia di ne, nene inimale tiyoona luvutin ghiit ve tipariaan ghiit pa taghur ila. Ighaze venen, pale tagham vena? Nepoon toit, nene inimale taneep ila landoon tiina, ve talaan soso mala. Tovenen mbeb naol to tipatajan ghiit pa landoon, toman ngar samsamia to tikau ghiit ne, iit irau tapul di tisob tinepledi. Ve talaan toman tapiriid taghon ataam to Maaron ighuri pait, ve takiskisi tovene le tapasob landoon toit. *1Kor 9:24+; Pil 3:13+; Hib 10:36*

² Ve mataad ila pa mbeb ite paam malep. Mataad ila pa Yesu moghon, ve talaan tanarua tala. Pasa, ye to imuun pait ve ipatoon ghiit pa ataam to taghur ila. Ve ye to pale igham uraat pait le ghurla toit ivot kat le denja moghon ila Maaron mata. Aghita. Ye imbaad patajani, ve tirabi imaata izala ai pambaroon. Eemoghon ye ighita mayanjiina tonowen inimale mbeb sorok. Pasa, ye iwatag: Ighaze itaghon katin Maaron ngar toni, nene pale muri ineep pooi toman tini iza. Tauto aazne, ye

[§] **11:40:** Mbeb poia to saveen waaro tonene isavia, nene uraat to Yesu Krisi.

ineep ila pa Tama Maaron nima waan igharau ina to ghamuun pooz. *Pil 2:8+; Hib 1:3, 3:1*

³ Onoon, sawa to ye ineep izi taan, ndiran sam-samiadi tighur koi pani, ve tizorzoora. Eemoghon ye iyoon ariana pa badoon patanani tonowen. Tovenen matamim kisin ngar to ye ighami, ve ataghoni. Pa vene, patanani tiam itatan gham le tapirimim isob. *Lu 2:34; Syg 2:3*

Maaron ipul patanani pida tivot pa ndinatu, lesa ipasalungan di

⁴ Onoon, yam aparab ariana pa atatan samia tapiri. Eemoghon tiam eta sinj toni imalinj sone.

⁵ Yam avaat lolomim imaagh pa saveen palotiinj eez to injarua yam to anim Maaron ndinatu ne? Isaav tovene:

“Natug, ighaze Ngeu Tiina ighur patanani eta payom pa ipasalungan ghom, ughita ini-male mbeb sorok malep. Ugham ngar pani pooi.

Ve ighaze iyaan ghom, lolom isami malep.

⁶ Pasa, tamtoghon tisob to Ngeu Tiina lolo ineep todi, ye ipasalungan di.

Ve tamtoghon tisob to ye igham di tinim ndinatu, ye iloslos di, lesa igham di tighilaal.”

Np 3:11+; Yems 1:12; Syg 3:19

⁷⁻⁸ Tovenen ighaze patanani eta ivot payam, ayoon ariana ve ambaada moghon. Pasa, patanani tonanan, nene ataam to Maaron ipasalungan gham. Ye ighamgham tovene pa ndinatu tisob. Aghita. Ighaze pain eta igham sosor, pale tama ipuli? Maau. Ndipain tisob, nditamandi tipasalungan di. Ve Maaron tovene paam. Ye

ighurghur patanani ivotvot pa ndinatu tisob, leso ipasalungan di. Eemoghon ighaze ye ipasalungan gham maau, nene ye ndinatu yam maau. Yam animale ndipain to ledi nditamandi maau. *Lo 8:5; Np 13:24*

⁹ Ve mbeb ite paam. Iit tawatag: Nditamaan to taan tigham toon ve tiloslos ghiit, leso tipasalungan ghiit. Ve sawa to tigham tovene, iit taroron padi ve neneenaad moghon. Ighaze venen, vena pa Tamaan Maaron to ingin anunuud ne? Pasa, ye ilib pa nditamaan to taan. Tovenen ighaze ye ighur patanani eta pait pa ipasalungan ghiit, tapul tauud ila ye nima, ve tambaada moghon. Leso muri, tagham nepoon poia.

¹⁰ Nditamaan to taan tipasalungan ghiit pa sawa tuku moghon, ve titaghon ngar to taudi tighita tighaze poia. Eemoghon Tamaan Maaron, ye ipasalungan ghiit, leso iuul ghiit kat ve tataghon ngar patabuan animale ye tau. *1Pe 1:15+; 2Pe 1:4*

¹¹ Onoon, sawa to tilos ghiit, lolood poia maau. Lolood ipatanan. Ve ighaze Maaron ighur patanani pait pa ipasalungan ghiit, nene pale ngara raraate moghon. Eemoghon lolood ipatanan pani kat malep. Pasa, ighaze patanani tonenen igham ngar toit ivot, nene pale muri tataghon ngar denja, ve taghita anona tovene: Itina Maaron pale talup ghiit tanim ee moghon, ve taneep toman lolood luuma. *Yems 3:17+*

¹² Yam pida animale tamtoghon to ilaan soso mala, le tapiri isob, ve nima ve aghe ipaspas. Eemoghon apariaan taumim ve akiskis landoon le apasobi! *2Tim 4:7*

¹³ Ve matamim ingal pa ataghon ataam denja to

Maaron moghon. Leso apalot nditamim pida to tiyoon ariana sone, ve ghurla todi ivot inim tiina le iyaryaaj. Tovenen apatum gham. Pa vene, ayel pa ataam to Maaron, ve agham di titap le tisami kat. *Np 4:26*

Tataghon ngar to taan tanimale Esau malep

¹⁴ Azuaria gham pa apatoon ngar luuma pa tamtoghon tisob, ve yamja alup gham anim ee moghon. Ve azuaria gham pa ngar patabuan. Pasa, tamtoghon to ighaze itaghon ngar patabuan maau, nene irau ighita Ngeu Tiina maau. *Mt 5:9; Ro 12:18; 2Kor 7:1; 1Pe 1:15+*

¹⁵ Yam apatum gham. Pa vene, ngar samia izeev tiam eta, ve ipul muri pa Maaron ve poia toni. Tamtoghon tovene, ye inimale waraman to itub iza ila lolomim. Ye pale iwaghamuni tamtoghon katindi, ve igham di tisami ila Maaron mata. *Lo 29:18; 2Kor 6:1; Hib 3:12*

¹⁶ Ve tiam eta ighur maat malep. Ve eta ipul muri pa Maaron, ve ngar toni iyaryaaj pa mbeb to taan moghon inimale Esau malep. Iit tawatag: Esau, ye ngeu aidaba, ve iza pa igham mbeb naol to tama. Eemoghon igham ngar pa mbeb tonenen maau, ve irabolin iza tonowen pa sur rubruub ee moghon kat. *Mbnp 25:29+*

¹⁷ Ve yam awatag. Muri, Esau ila to tama ve ighasoni ariana ighaze ighur poia to Maaron iza toni. Eemoghon tama izugua. Esau izoorndug pani, ve itanj tiina. Eemoghon sosor to ye ighami, le ataam eta pa igharaata muul maau. *Mbnp 27:30+*

*Ataam paghu to tala tagharau Maaron ilib pa
ataam munjina to ivot izi lolooz Sinai
(Igham 19:12+, 20:18+)*

¹⁸⁻¹⁹ Aazne, yam anim avot ndug to irau aghita pa matamim ve akisi pa nimamim animale yes Israela ne maau. Muun, sawa to Maaron ivot todi izi lolooz Sinai, yes tighita yab to ighanghan izala lolooz Sinai daba, toman yaghur tae asosoonja to ikau lolooz tonowen. Ve tighita ndoroom tiina, ndug milia, ve yaghur tiina. Ve tiloon mbeb to avolutu inimale tavuur itan tiina. Ghoru tiloon Maaron aliija. Tauto matughezaan tiina igham di le tisami kat. Ve titan roran Mose tighaze isaav pa Maaron, leso isavsaav padi muul sob.

²⁰ Pasa, timatughez pa tutuun ariana to Maaron isavia padi ighaze: “Tamtoghon ma ngai eta ighaze itut lolooz pughu, yam arabi pa yaam le imaat.”

²¹ Mose ighita mbeb naol tonowen, le ye paam imatughez kat, ve isaav ighaze: “Matughezaan igham ghou le tinig irur kat!”

²² Eemoghon yam, aazne anim avot ndug tovene maau. Krisi igham gham anim avot lolooz Zion wa. Nene Yerusalem to sambam, ndug tiina to Maaron mata yaryaara. Anjela ndinndin ndinndin tiluplup di tonowe toman tinidi iza. *Ga 4:26; Pil 3:20; Syg 21:2*

²³ Ve yam aneep ila lupuun to Maaron ndinatu aidaba.*

* **12:23:** Saveen tonene, nene saveen palelaan. Pasa, iit to taghur ila to Krisi ne tanim Maaron ndinatu aidaba kat maau. Yesu moghon, ghoru Maaron Natu aidaba kat. Eemoghon ye pale ipakur ghiit ve igham leed mbeb popoia katindi, inimale tamtoghon tighamgham pa ndinatudi aidaba.

Tamtoghon tisob to tineep ila lupuun tonene, yes tinim ndug sambam tamtoghona. Tauto izadi ineep ila rau to ndug tonowen. Ve aazne, yam agharau Maaron wa. Ye ngeu to pale ingabiiz tamtoghon tisob ve ighur atia padi. Ve anim avot to ndiran denjadi to aazne tineep izi ndug sambam. Ndiran tonowen, Maaron igham ngar todi isob poiawaat ila ye mata. *Lu 10:20*

²⁴ Ve aazne, anim avot to Yesu. Ye to iyoon bodbodaan pa Maaron ve iit tamtoghon, ve igharaat ataam paghu, lesu itinja Maaron talup ghiit tanim ee moghon. Siñ toni, tauto ipariaan saveen mbuaan to ataam paghu tonowen. Tovenen siñ toni ilib pa siñ to Abel. Pasa, Abel siñ toni ipoipoi Maaron ighaze iyati. Eemoghon siñ to Krisi, nene ipoipoi Maaron ighaze ireu sosor toit. *Mbnp 4:10+; 1Tim 2:5; Hib 8:6, 9:15+*

Tapoon taliñaad pa Maaron aliña malep

²⁵ Aloon. Aazne, Maaron tau isavsaav pait. Tovenen apoon taliñamim ve azoor saveen toni malep. Aghita. Yes Israela to muun tipoon taliñadi pa Maaron aliña ne, irau tipaghau taudi pa mbalmbali toni? Maau. Eemoghon sawa tonenen, ye ivotia aliña padi izi taan. Ve aazne, Yesu ineep izi sambam ve isavsaav pait. Tovenen ighaze taghur muriid pani, pale tapaghau tauud pa mbalmbali toni vena? Maau le maau kat! *Hib 1:2, 2:1+, 10:26+*

²⁶ Sawa to Maaron isavsaav pa yes Israela, aliña itok taan le kattia, inimale yongyoog. Ve aazne, ye imbua saveen ighaze:

“Muri, you pale natok taan pa ee moghon, ve isob.

Ve tonene moghon maau. Pale natok sambam paronania paam.” *Igham 19:18; Hag 2:6*

²⁷ Saveen waaro to isaav ighaze ye pale itok taan “pa ee moghon ve isob” nene ngara tovene: Maaron pale itok mbeb tisob to ye ighur di. Leso mbeb to arianadi maau, timbiriis ve tilaledi, ve mbeb arianadi to irau katia maau ne, moghon to tineep. *2Pe 3:10; 1Yo 2:17; Syg 21:1*

²⁸ Pooz to Maaron toman ndug toni, nene mbeb arianadi. Irau katia maau, ve tineep tovene irau sawa isob. Tovenen iit to ye igham ghiit taneep ila pooz toni lolo ve izaad pa taloon tala ndug toni ne, irau tapatoon lolood poia ila pani, ve taroron pani. Leso sunuun toman mbesoon toit itaghon ye lolo. *Pil 2:12*

²⁹ Pasa, Maaron toit, ye patabuan kat.

Ye inimale yab to moghon moghon ighanghan. *Igham 24:17; Lo 4:24; 2Tes 1:7*

13

Ataam to tataghon Krisi

¹ Ngar to taghur lolood pa tonvetaz to Krisi, yam apuli malep. Akiskisi. *Yo 13:34+; Ro 12:10; 1Pe 1:22*

² Ve ighaze loomba tilat, agham di tila ruum tiam toman lolomim poia, ve angin poian di. Ngar tovene, lolomim imaagh pani malep. Pasa muun, tamtoghon pida tigham yes loomba ve tighaze pa yes tamtoghon sorok. Eemoghon maau. Yes to

tigham di tila ruum todi, nene yes aņela. *Mbnp 18:1+; Ro 12:13; 1Pe 4:9*

³ Ve matamim ingal Maaron tamtoghon toni to tineep ila ruum to yabyabuun lolo. Agham ngar inimale yam anepneep toman di tonowe. Ve matamim ingal yes to tamtoghon tigham samin di. Agham ngar pa pataņani todi tonowen inimale yabyabuun igham gham paam, ve auul di. *Mt 25:36; Ro 12:15; 1Kor 12:26; Hib 10:34*

⁴ Yam asob irau aghita ngar to vaiuun inimale mbeb tiina, ve matamim ingal taumim ndizwamim, ve aneep toman di moghon. Leso asami ila Maaron mata sob. Iit tawatag: Yes to matadi samia tinimale ngavuun, ve yes to tighurghur maat, Maaron pale ighur atia padi. *1Kor 6:9+; Syg 22:15*

⁵ Ve lolomim igham pa yaam malep. Ighaze lemim ris, nene iraua. Pasa, Maaron tau isaav ighaze:

“You irau napul ghom, ma naghur murig payom ne maau.” *Mt 6:25+; Pil 4:11+; 1Tim 6:6+*

⁶ Tovenen iit tamatughez malep. Taghur ila to Maaron ariana, ve tasaav taghaze:

“Ngeu Tiina, ye Ulaaņa tiou.

Irau namatughez pa mbeb eta maau.

Pale tamtoghon tigham sa payou?” *Mbo 56:4, 118:6; Ro 8:31+*

⁷ Matamim ingal yes to timuun payam ve tivotia Maaron aliņa payam. Matamim kisin ngar poia to tighamghami ne anoņa toni, ve ataghon katin di pa ghurla todi. *1Kor 11:1; 1Tes 1:6+; Hib 6:12*

⁸ Pasa, Yesu Krisi, ye itortoor ngar toni maau. Muuñ, aazne, ve muri paam, ngar toni inepneep tovene irau sawa isob. *Mbo 102:27+; Mal 3:6; Yems 1:17*

⁹ Tovenen saveeñ soroksorok to iyel pa saveeñ to Maaron, nene iweu gham ve apul ataam toni malep. Onoon, ndiran pida tizuaria di taghaze le titaghon katin tutuuñ naol to inarua aniiñ ve mbeb pida. Eemoghon ngar to tighamghami, iuul di rita maau. Tagham tapiriid ila poia to Maaron, ghoru poia. *Ro 14:17; Ep 4:14; Kol 2:4,16+*

¹⁰ Iit leed artaal eez inepneep. Eemoghon ndiran to watoonrau to timbesmbees pa Maaron iloon ila mbeez patabuan to yes Yuda, yes ledi izadi pa tighan aniiñ to inep ila artaal toit tonowen maau.

¹¹ Aghita. Ndaman to naol, ighaze sawa tiina to rewaan sotor ivot, nene daba to watoonrau igham siñ to ngai, ve iloon ila mbeez lolo to patabuan kat, ve igham watoonrau pa ireu sotor to tamtoghon. Eemoghon ngai anonadi, nene tigham di tila saguan pa ndug todi to nepoon, ghoru tighur di tizala yab ighan di.

¹² Pughu tonene to Yesu paam, tighami tivot tila saguan pa ndug tiina Yerusalem, ghoru tirabi imaat toman yabyabuñ tiina. Nene ataam to Maaron itaghoni, lesu siñ to Yesu ireu sotor to iit tamtoghon, ve igham ghiit tanim tamtoghon toni patabuana. *Mt 21:39; Yo 19:17+*

¹³ Tovenen iit paam irau tapul lupuuñ to yes to tizurun Krisi, ve tavot tala toni. Ve ighaze tipamayanin ghiit inimale muuñ tigham pani, nene poia. Sa patañani to tigham pait, tambaada moghon. *Lu 9:23; Hib 11:26, 12:2; 1Pe 4:14*

¹⁴ Pasa, iit tawatag: Taan tonene, iit leed ndug ti-ina eta to iit irau taneep pani itaghoni taghoni gha ila ne maau. Nene tazuaría ghiit pa Maaron ndug toni. Ndug tonowen, muri pale ivot ighazoon. *Pil 3:20; Hib 11:10+, 12:22*

¹⁵ Tovenen iit tapait Maaron ila Yesu iza. Onoon kat, iit to taghur ila to Yesu ve tavotia iza ne, avood pale ipait Maaron irau sawa isob. Nene inim watoonrau toit ila pani. *Mbo 69:30+; Ep 5:20; 1Pe 2:5*

¹⁶ Ve agham poian tamtoghon ve arei mbbeb tiam padi. Ngar tovene, lolomim imaagh pani malep. Pasa, nene watoonrau ite to igham Maaron lolo poia. *Ro 12:13; Pil 4:18*

¹⁷ Aloon nginiina tiam aliñadi ve aneep ila sambadi. Pasa, yes to matadi payam ve tipatoot gham pa nepoon to anunumim. Ve muri, yes pale tiyoon ila Maaron mata, ve tipaesia uraat todi pani. Tovenen yam aloon saveen todi. Leso tigham uraat todi toman lolodi poia. Ighaze moghon moghon aghamgham patañani padi, nene irau uraat todi iuul gham kat maau. *1Tes 5:12+; 1Tim 5:17*

¹⁸ Nighason gham nighaze aghur ghei ila sunjuun tiam. Onoon, yei niyamaan taumai nighaze ngar tiei, nene ingalaan ila Maaron mata. Eemoghon apul sunjuun payei malep. Pasa, nighaze ngar tiei isob poia ve denja moghon ila Maaron mata. *Mbanj 24:16; Ro 15:30; 1Tes 5:25*

¹⁹ Ve mbbeb ite to lolog pani kat, nene naghaze yam asun Maaron ariana, lesu iuul ghou ve rikia nalat naghita gham muul.

Saveen palotiin

20-21 Tiina toit Yesu Krisi to imaat ve Maaron ipamundigini pa mateen, ye to nginiin to sipsip, ve iza tiina kat.

Sinj toni imaliñ, tauto ipariaañ saveen mbuaañ to ataam paghu to itinja Maaron talup ghiit tanim ee moghon.

Ataam tonowen pale ineep tovene itaghoni taghoni gha ila. *Yo 10:11; Hib 9:15+; 1Pe 2:25, 5:4*

Ve Tama Maaron to igham ghiit taneep poia toman lolood luuma, ye pale irei ngar popoia naol payam, lesu yam irau ataghon lolo.

Ve ila uraat to Yesu Krisi, ye pale ipamundigin gham, lesu agham ngar popoia moghon ila mata.

Tovenen iit irau tapait iza itaghoni taghoni gha ila. Onoon. *Pil 2:13; 2Tes 2:16+*

Paesiñ pida

²² Yam tonvetaz, you nambood saveen tuku ila rau tonene pa napalot gham. Ve naghason gham naghaze aghur taliñamim pani pooi. Ayasiil malep.

²³ You napaes payam pa itaad ite Timoti. Ye, tipuli ivot pa ruum to yabyabuñ wa. Ve ighaze inim ivot rikia, nene pale yeru nilat nighita gham.

²⁴ Agham ndag poia tiei pa nginiinja tiam, ve Maaron tamtoghon toni patabuanja tisob to tineep izi tonanan. Yes to Itali to yeinja ninepneep ne, ndag poia todi ilat payam paam.

²⁵ Poia to Maaron iza to yam asob. Onoon.

Maaron Saveen Toni Patabuan
The New Testament and portions of the Old Testament
in the Oov Dialect of the Saveeng language of Papua
New Guinea. The Saveeng language is also called Mutu
or Mutu-Tuam.

Sampela hap Buk Baibel long tokples Saveeng Oov
long Niugini

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

c7a45d99-91a2-564f-9c55-d2efc8be7fae